



Туризм лядуккан даврил хІакъираву

● Аьрасатнал Президент Владимир Путиннул Дарбантлив видеоконференциялул журалий совещание дунни.

2
лаж.



ЧРЛИ

№27
(2193)

7 ИЮЛЬ 2023 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкІссар 1917 ш.
Цунил итабакълан бивкІссар 1991ш.

Президентнал Кремлилуву къамул бунни Раисат



ПатІмат РАМАЗАНОВА

«Тун, Дарбантлия лавгун, Москвавлинай учІайхту, ина аьІутІсса сурат ккаккан дурна. Цуксса хІайпнугу, ттуша та къини майданнив увксса гьарманашал гьалгъа бан къахъунссия, амма ттун къурчІи бивзуна нава къаккаквария вин къащи хьуну душиву. Ттушава чья-ччяни учІан хъанай бакъахъувкун, ттун пикри хьунни вийнгу, вил нитти-буттайнгу Кремлилувун оьвчин», – увкуна Президентнал, хъямалагу агьну, тІутІал кацІ душнихъхьун буллай.

Яла Президентнал, хъамал цалва кабинетравун буххан був-

Июнь зурул 28-ний Дарбантлив Аьрасатнал Президент Владимир Путин паркраву шагьрудул агьулданучІан увккунна, ПатІма Тагъирован, дуклаки душнин, тІайлабацІугума хъуна билаятрал бакІчинашал сурат рищун. Интернетраву ва сурат машгьурну дия. Машгьурну дия цамургу видео: 8 шинавусса Раисат Акипова, халкъуннал ккучундалулу Путин так архнияту акъа къаккаккунни тІий, аьІутІсса. Ва иширая хавар хъусса Президентнал душнийн ва ванил нитти-буттайн Кремлилувун оьвкунна.

ну, Раисат цала столданух шя-бивтунни. «О, ява бавкъуну бура!» куну хьярчгу бунни. Ва хІалатраву Путиннул телефондалувух оьвкунни Аьрасатнал ХІукуматрал хъунама Михаил Мишустиннуйн. Ванахъ бувсунни кІилчинмур классраву дуклакисса Дарбантлиясса душ хъамалу бувкІун бушиву. Яла оьв-

кунни финансирттал министр Антон Силуановлуин, бувсунни Дагъусттаннай дуван дакІнийсса давуртту бардигьин арцу диял хъанай дакъашиву. Силуановлул бувсунни ххюва миллиард ялунгу личІи буллалишиву Дагъусттаннан. Путиннулли душнихъ хьярч бунни, «ина цІанакул Дагъусттаннан ххюва милли-

ард бучІан бувссар» куну. Цала кабинетравусса экскурсиялия махъ, Путиннул хъамаллурайн чяй хІачІан оьвкунни. Президентнал бувсунни шагьру ялун-ялун ххуй хъанай бушиву, амма цанна сант къадагъшиву къалалул чІарахсса ххулийхъ паракъатну сайр буван. «ТІайламур бусан, жу махъунмай нанийни анавархъиндарай бивру му кІичІиравун, утти пашманну ура паракъатну сайр къабуаврия», – увкунни Президентнал.

Раисатлул нитти-буттал барчаллагъ увкунни Президентнахъ Дарбант шагьру сантирай ва лябуккулий хъхьичІунмай шаврицІун кабакъаврихлу ва

шагьрулул ххюазарда шин дулаврихлу. Ванихунгу Президентнал увкунни, шагьру ххуй шавриву ххюва миллиард ххишавриву Раисатлул бутІа бушиву, шагьрулул тарихрал хІакъиравурив, 1971 шинала зузисса археологтурал шагьру ххюазарда шинал хъхьичІва хІасул хъушиву барашинна дуршиву, яла, ялу-ялун хъун хъанай, шагьру хІисаврай Дарбант кІиазарда шинал хъхьичІ цакъ хъушиву.

Душил нитти-буттал бувсунни, Раисат Президентнал кабинетрава буккайхту, «ва иш макІ диявав, кІихъраявав» тІий, билаятрал хъунама ккаккавариясса ххаривурул вих бакъа бивкІшиву.

Туризм лядуккан даврил хІакъираву

Аьрасатнал Президент Владимир Путиннул Дарбантлив виде-
Аоконференциялул журалий совещание дунни.



Адриана АБДУЛЛАЕВА

Ва дия туризм хьхьичІуннай
даврил хІакъиравусса.

– ХІакъину жува буру Дагъусттаннай, Аьрасатнал яла хьхьичІавамур шагърулий Дарбантлив. Хъунма хІал къавъхъунни Дарбантуллан 2000 шин шаву кІицІ ларгун. Мыйжаннугуриг шагърулун 5000 шин хъуну дур. Му мыйжан булла бур совет заманайрасса археологиялул раскопарттал. Шикку бур Аьрасатнаву яла хьхьичІавамур мизит. Ттула коллегашчал на увкІра шиккун билаятрай туризм хьхьичІуннай дансса ххишаласса чаранну льякъаву мурадрай.

Виваллил туризм Дагъусттаннай, хасну Дарбантлив хъинну хьхьичІуннай хъуну дур. Дагъусттан, Дарбант чъянивассса кІанттурду бушивруцІун, шикку караматсса тІабиабтгу ва тарихрал гъайкалуну хъанахъисса чІявусса кІанттурдугу бур.

Гъарнан кІулли Ккавказуллал халкъуннан хъамал ххирашивриягу, укунсса чІумал чара бакъа аьркин дагъайсса шикку чъялишну итадакълакъисса хІанттил продукциягу. ХІасил, ва бур зунгу, бигъалагангу рахІатсса кІану. Жул аьрххилул повесткалуву бур миллатрал туризмалул отрасль хьхьичІуннай даврицІун бавхІусса масъаларттугу. Бурганну проектирдах. Шагърулул хъунама архитектор буслай ур жагъилсса командартту душиврия, проекту шаллу дулла бушиврия. Вай чІумуй шаллу дансса арцу цукун льякъин дурив пикри бан бур.

Виваллил туризм хьхьичІуннай шаву, гъай-гъай, къатІаллил иширттайнгу хъар хъун-

ни. Цаппара хІукуматирттал хъуниминнал чулухасса ссуссуку буллалаву, личІи-личІисса журалул санкциярду, русофобия. Жула халкъуннан ххуллурду лавкъуну, цала репутациягу зия дунни, доходирттацІагу хъунни, партнертурал вихшалугу къуькин дунни.

Жула туризмалул индустрия ялу-ялун хьхьичІуннай хъанай най дур. Транспортрал инфраструктура хьхьичІуннай даврил, курортру, гостиницарду, ресторанну ва жяматийсса кІанттурду ххуй баврил сиптарду ва проекту шаллу хъанай бур. ПаччахІлугъралгу, ватандалул бизнесралгу агъамур мурад бур туризмалул хІаллихшиннардал даража гъаз баву, личІи-личІисса ахІвал хІалданул, оьрмулул инсантурал тІалавшиннарду хІисравун ласаву. Аьрасатнаву туризм хьхьичІуннай дансса циняв шартІру дур. Бур тарихрал, культуралул, тІабиабтрал хъунмасса потенциал. ТІабиабтрал дахханашивурттал чулуха дуняллий жучІанма бивсса бакъар.

ЧІявусса агъамсса хІукмурду къамул бувссар. Миннуву кІицІ лаган ччива хъуннасса агъамшиву дусса хІукму – гостиницарду бансса кредитирттан кукулшиннарду даву. Вай кукулшиннардайн бувну булла буссар 25 азарва номер бусса 87 цІусса объект.

КІицІ лаган, цаппара жу ххал бивгъусса, хъин чулий ккавказса масъалартту шаллу буллай бакъар. Масала, туроператортал НДС-лия тархъан баврил масъала.

Ттун ччива автомобильный туризм анавар дуккан даврил концепциягу чъяни ххал диргъуну. Гъарта дуллан аьркинни

ххуллул инфраструктурагу, сервису. Вай цимурцаннуха зун аьркинссар бахътасса туризм хьхьичІуннай хъуншиврулгу.

Ца агъамсса масъалану хъанахъиссар шинал лажиндарай тІивтІунмасса, шинал 10 миллиондалийн бивсса инсантал къамул бан шайсса хьхьирил курортирттал проекту даву. Жула халкъ бигъалагансса шартІру ва багъри яла ххуйми дуняллул стандартирттайр ялавайсса къабикІансса куцуй бан аьркинссар вай курортру.

КІицІ лаган, Ухссавнил Ккавказуллал федерал округрал регионну туристтурал чулуха хьхьичІ ххуттай дия. Миннувугу хьхьичІва-хьхьичІ Дагъусттан бия. Ухссавнил Ккавказ, мыйжаннугу, ляличІисса тІабиабт дусса кІанттурду бур. Кисловодск, Пятигорск ва цаймигу машгъурсса центрду бур шикку.

КІул хъун ччива Къарачай-Чаргаснаву «Архыз», Къабардин-Балкарнаву «Эльбрус», Чачаннаву «Ведучи» курортру хьхьичІунмай баврил программарду ссайн дирну дуссарив. 2020-ку шинал Ухссавнил АьсатІннаву «Мамисон» курорт буллай байбивхъуссар. Миккусса давурттугу ссайн дирну дурив ххал данну. Бурганну мукунма кІива цІусса курортрал (Ингушетиянаву «Армхи» ва Дагъусттаннайсса «Каспийский прибрежный кластер») инфраструктуралул давуртту цукун дуллан най бурив.

Транспортрал министр Виталий Соловьевлул бувсун ччива транспортрал инфраструктура, гъавалулсса, муххал ххуллулсса, мукунма дазуйсса пропускной пункту хІалану, хьхьичІуннай даву мурадрай ци дуллай буссарив. КІулли чІярусса давуртту дуллай бушиву, ми хъиннура чъялиш дуккан дан аьркинссар. Бакъин буллай буссар «Кавказ» ххуллул цаппара кІанттурду, утигъанну зун бивкІссар Аксай, Краснодар шагъурдал чІарах лагайсса машиналул ххуллурду. Мукунмасса проекту аьркинну бур Дарбант, МахІачкъала, Хасавюрт шагъурдангу. ЛяличІуну гъаз бан ччива авиасообщениелул масъала. ДакІний буссар МахІачкъалаллал ва Грознайлул аэропортру цІу буккан бан.

Жула курортирттайн най бур цайми билаятирттаясса инсанталгу. Ми авара къабувну къамул буллансса чаран льякин аьркинссар. Масала, туристал заназисса агъамми кІанттурдайн электрон виза дуллансса сант рутан аьркинссар.

ХІакъину жува личІуну ххал бигъинтІиссар Дарбант хьхьичІунмай баврил масъалагу, – увкунни Владимир Путиннул.

душнин оьрмулухун дакІний личІувча! Барчалагъ Раисатлул нитти-буттан, Ахметлун ва Кулиумлун, цалва оьрчІру ватан ххирану тарбия буваврихлу. Барчалагъ Президентнангу – жулва Дагъусттаннаясса душ ххуйну къамул бувну ххари буваврихлу», – тІий чивчунни Дагъусттаннал БакІчи Сергей Меликовлул телеграм-каналдай, Аьрасатнал Президент Владимир Путиннул Кремлилуву къамул бувайхту Дарбантлив цува къаккаквария къуману аьтІутІисса 8 шинаву Раисат Акипова.

Билаятрал Президент хъунаавкъунни Республикалул БакІчинащал

Аьрасатнал Президент Владимир Путин хъунаавкъунни
Дагъусттаннал БакІчи Сергей Меликовлул, аьмну республикалийсса тагъарданул, ванил социал-экономикалул
хьхьичІуннайшивурттал ялув цІухху-бусу баншиврул.



Бадрижамал АБЛИЕВА

Билаятрал Президентнал буллусса суаллахъхъун жавабру дулла, Сергей Меликовлул увкуна:

– Дагъусттаннал социал-экономикалул хІакъинусса буши шаллу хъанахъиссар республикалий къамул дурсса стратегиялуцІун бавкъуну. Ванийн бувну, цалчинмур этапрайми хьхьичІуннайшивуртту дикІантІиссар 2025-ку шинайннин, кІилчинмур этапрайми – 2030-ку шинайннин. Агъамми ххуллу-ххутардия на вихъ хьхьичІмур хъунабакъаврий бувснугу, кІицІ лаганна вай цинявнну хьхьичІва-хьхьичІ хІисаврайн ларсун душиву социал сфера хьхьичІуннай даву, агъалинансса шартІру шаллу даву. Гъашину жулва гужхІарачат жу хъунмурчІин тІайла буллай буру кІулишву дулаврил объекту баврийн ва вайннул ремонт даврийн. ТитІантІиссару цІусса школарду, школалийн гъаннинсса кІулишву дулайсса идарартту. Вай давуртту дуллайна хІисаврайн ласлантІиссару контрактрайн бувну Каспийскалал аьралий флотилиялий къуллугъ буллалиминнан аьркинмур. Умуд бур лавай кІицІ лавгсса объектирдава сса чІявуми 1-мур сентябрьдайннин тІитІиссар тІисса, ливчІмигу, графикрайн бувну, шинал ахирданайннин.

Владимир Владимирович, хІакъинусса совещаниялий ххал бивгъунни аьмну Ухссавнил Ккавказнаву ва хасну Дагъусттаннай туризм хьхьичІуннай даврийн багъайсса цаппарасса масъалартту. ХІакъину Ухссавнил Ккавказнал туристический кластерду хьхьичІуннай даврийн дагъайсса хІакъинусса программалиягу тийнмай къахъанай, учин ччива – Дагъусттаннал душиву ва чулухасса ляличІишиву: шикку бушиву СКФО-рал махъсса ряхрагу объектрай бакъасса хьхьери. Ванийн бувну, агъамми гужру харж буллантІиссару каспийскалал хьхьирил кластер хьхьичІуннай даврин. Аьрасатнал Федерациялул

ХІукуматравусса жулва уртакътурахъ тавакъю буллантІиссара кумаг буллан Шалагу Аьрасатнал оьрчІал центрданул проект давривугу, яла ва цуппа бавривугу.

ХІакъину цІуллу-сагъшиврул даража лавай бувайсса чІявуми лагерда бигъалаглай бур цІусса территориярттаясса оьрчІру. Жу оьвчарду вайннайн шихун, бигъа-рахІатну чІун гъан дуллайгу буссар вай. Ччива ва иширавусса каширду хъуни хъуну, – увкуна Республикалул БакІчинал.

Гихунмай ванал бувсуна ларгсса шинал 1-мур мартрайва сакин бувшиву «Все вместе» цІанилул фонд, цилгу кумаг, чІаравбацІаву дуллалисса СВО-рал гьурттучитурал кулпартирттал, ва шинал июндадул 1-ний тІурча, тІиртІушиву «Защитники Отечества» федерал фондрал кІанттул отделение, ванича зий душиву ниттихъал организация, шахъаннил организация ва м.ц.

Билаятрал Президентнал буллусса аьмну республикалийсса экономикалул тагъарданайн багъайсса суалданун Сергей Меликовлул увкуна:

– Владимир Владимирович, ттул пикрилий, Дагъусттаннан махъсса субъектирданни-яр ххишаласса тІайлабацІу хъуссар, цанчирча дазул кватлатусса хІакъинусса санкциярттал вари чинсса асар биян къабуллай тІий жуйн, хІакъину экономика хьхьичІуннай нанаврил бушигу хъар хъанай буну тІий жучІавасса гужирдайн. Щаллу бунан багълагъисса ца масъала бур – инфраструктура, ванил ялув зурча, жучІа бикІантІиссар личІиличІисса предпритияртту...

Щанасса чІумал жу дуллай буру западрал дуккан дуллалисса эбратрансса ччимур журалушал бяст-ччал бунан шайсса хІачІияртту. Западрая хъар къахъананшиврул тІурча, хІакъину жу зий буру Дагъусттаннай уку-укунсса давуртан аьркинмур дуллансса питомникру тІитІавриха, – бувсуна Республикалул БакІчинал Билаятрал Президентнахъ.

«ОьрчІал хияллу бартлаглан аьркинссар»

ПатІимат РАМАЗАНОВА

«Щалва билаят хІакъину Владимир Владимировичлул ва Раисат Акиповал хъунабакъаврий тамаша бувну бия. Душнил Президентнахъхъун дахъва ссалам булун ччисса мурад бушиву чІявуссаннан асар хъуну бия. Билаятрал БакІчинал

цанмагу асар хъуну бия. ОьрчІал хияллу бартлаглан аьркинссар. Ми бартлаганшиврул, жува, хъуними, кабаку буллан аьркинссару. Нагу кІул хъура ва душнишал ва нитти-бутташал Дагъусттаннал Постпредстволлий, ссайгъатругу булаву, кумагчитурангу Москвалив экскурсиялий буцин тапшур бував. Ва аьрххи

Июльданул 3-нний Дагъусттаннал БакIчи Сергей Меликовлул Агъамсса социал масъалартту ххал бигълагъисса совещание дунни. Вай масъаларттавуу гъануми бия ятинсса оьрчIру къатрал шаллу буваву ва социал контрактру цIакъ дуваву.

Ятинтал ялув магъи дакъа къаличIан



ПатГимат РАМАЗАНОВА

Меликовлул бувсунни уттигъанну Аьрасатнал Президент Владимир Путин Дагъусттаннайн учIаву дархIуну душиву туризмалуцун, республикалий социал-экономикалул тагъар къулай дувансса чаранну ккаккаврицун. «Туризм хъхьичIуннай хъанахъиссаксса, агъалинал оьрмугу сантирай ва лябуккулий хъхьичIунмай хъанахъиссар», – увкунни ванал.

ХIукуматрал хъунаманал цалчинма хъиривчув Руслан Аьлиевлул бувсунни, национал проектирттал контрактру республикалий 55,4 % цIакъ дуршиву ва вай проекту чара бакъа ккаккан дурсса чIумуй бартидигъинсса хIарачат бикIан аьркиншиву.

Дагъусттаннал Минстройрал хъунама Артур Сулаймановлул бувсунни, гъашинусса шинал 18 шагърулул ва райондалул ятинтурава бачIиннасса къатри машин лавсшиву. Ванал бувсмуннийн бунну, январьданул 1-ннин усса ур квартирардах мюхтажсса 3276 ятин. Вай къатрал дузал бун бюджетраву ккаккан дурну дурса дур 780 миллион арцул. Щаллуну ятинтал къатрал дузал бувсса районнавух кIицI дунни

Лакралмур районгу. БачIи дузал бувсса шагърудая ва районная тIалав бунни ятинтал шаллу къабуну къаличIансса даражалый даву дуван. Меликовлул гапшур бунни квартирарду багъайсса ятинтурал сияхI сентябрьданул 1-ннин хъирив лавну ххал дигъин. «Кувний сияхIирттаван багъну лякъай ятинтал бакъамигу, мунияту сияхIру ялув бавцIуну, хъирив лавну ххал дуван аьркинссар», – увкунни региондалул хъунаманал.

ЗахIматрал ва социал развитиялул министр Мурад Казиевлул бувсунни 2023 шинал ахирданийннин республикалий 6 азарда социал контракт цIакъ дувансса ният душиву, июль зуруйиннин цIакъ дурну душиву 4 азарунниха лирчусса контрактру. Ванал кIицI лавгунни СВО-лий гуртту хъанахъиминнал кулпатирттая контракт цIакъ дуван ччисса аьрза бухъурча, хъхьичI ирглий минналсаннух къулагъас дувайшиву. ХIакъинунин укунсса кулпатирттал цIакъ дурса душиву 168 контракт.

– ХъунмурчIин социал контрактру цIакъ дувай ризкъилуха зузиминнал, мукунма дуки хIачIиялул ягу цамур журулул производство зузи дуван ччинал, – увкунни ванал.

Дузалну дикIан аьркинссар циняв шартIру

Июльданул 5-нний ДР-лул Халкъуннал Мажлисрал Председательна хъиривчув Камил Давдиев, Дагъусттаннал парламентарал Элмулул ва кIулшивуртту дулаврил комитетрал председатель Елена Павлюченко ва ДР-лул Халкъуннал Мажлисрал Культуралул, жагъилтурал иширттал, спортрал ва туризмалул комитетрал председателна хъиривчув Марина Котенко бивунни ремонтру дуллалисса МахIачкъала шагърулул 40-мур ва 42-мур школарттайн.



Имара САИДОВА

ХIукуматрал делегациялул кIулшивуртту дулаврил идараттай дуллалисса ремонтрал давуртту ккаккан дунни МахIачкъала шагърулул КIулшивуртту дулаврил управлениялул хъунама Мурад Шафиевлул.

Делегациялул ххал бунни школарттал пищеблокру, классру, кабинетру, актовий ва спортивный залу.

КIивагу школа бур цикссагу шиннардил хъхьичI бувсса, бакъин бан, цIу буккан бан багълагъисса. Гъануцакулсса ремонтру даврил федерал программалул лагрулий школарттай дакъин дурну дур магъив, инженер сетьру, ттукIрал ххаллу, цIу лаган бунну бур къатIухсса чIиртту, дуллай бур вивсса давуртту.

Елена Павлюченкол бусаврийн бунну, кIицI ларгсса программалул лагрулий гъашинусса шинал гъануцакулсса ремонтру дуллай бур кIулшивуртту дулаврил 141 идаралий, вайннува 14 бур МахIачкъалалив.

Объектру ххал дигълай, Ка-

мил Давдиевлул кIицI лавгунни дуклаки оьрчIал цIусса дуккавил шин цIу лаган бувсса, дузалсса шартIру дурса школарттай дайди хъиншивул, строительстволул давуртту ккаккан дурсса чIумуй къуртал дан, анавар дуккан дан аьркиншиву. 40-мур школалий ккаккан бувсса графикрайн бунну ремонтрал давуртту къуртал дан къашаврил савав дур строительстволул материал ххира шаву, цIуницIакул смета ххал дигъин багълагъишиву. 42-мур школалий хIасул хъусса укуннасса тагъар анавар дуккан дан бювхъуну бур. Шиккува кIицI лавгунни ва объект депутатътурал корпусрал ва шагърулул администрациялул аякъалийн ларсун душиву.

Депутатътурал кIицI ларгунни анаварсса мутталий духлаган дан аьркинсса диялдакъашивурттугу.

Объектру ххал диръгуну махъ Камил Давдиевлул кIицI лавгунни: депутатътурал гихуннайгу хъуннасса къулагъас дулантIишиву кIивагу школалий ва цаймигу социал объектирдай дуллалисса давуртта.

Криминалданул хаварду

ХIАРАМЗАДАТУРАЛ ХЪЯВРИН КЪАБАН

● Дагъусттаннал Виваллил иширттал министерство цал ттигу баян буллай бур: личIлулну бикIияра интернетрайхчин машина буллалиний ягу онлайн хIаллихшиннардах багъа буллалиний тий.

Ххал дуvara даххултурал ягу идарардал рейтинг. Дуккиара хъхьичI машина бивминнал отъиврду. Ххал буvara организациярдал сайтрайсса информация. Хъирив къалавну машина мабару соцсетирдаву. Соцсетирдал администрациялул жаваб къадулайссар сетрайхчин бувсса машлух. Арцу дичиннин мукIру шияра зура ласла-симур дахлахманачIа мийжанну-гу душиврий.

НАРКОТИКРУ ЛЯВКЪУННИ

● Ххалбигъавуртту дуллалисса УКОН-далул (Наркотикру ишакъаш баврил ялув бацIаву дайсса управление) зузалтрал МахIачкъалалив, Буйнакский цIанийсса кIичIираву, увгъунни шиччавасса 37 шинавусса адамина. ЦIухла бивхъуну, ваначIа лявкъунни кIяласса, мефедрондалуха лавхъхъусса ххит бувса къуцури. Экспертизалул мийжан бунни вай мефедрон бушиву. Къуцуруттувусса наркотик 52 дянивсса дозалунсса бур. ЦIухху-бусу бунну, кIул хъунни ванан наркотикру баххан ччай бивкIшиву.

Ва иширал хIакъираву АьФлул УК-рал 228 статьялул 2-мур бутIуну бунну уголов дело суку дунни.

БИВНУ БУР

● Къумтуркъалалал райондалул полициялийн баян бунну бур, 32 шинавусса шиччавасса адамина цаманал авттул, цIунциартту дунни куну. Хъиривляувуртту дуллалисса полициялул зузалтрал кIул бунну бур хъхьичIмур къини ссят 1.30 мин. хъусса чIумал, райондалийсса ца шяраву архIал хIачIлай ивкIсса кIия адаминал рагъну дур. Цаннал (ва оьрмулул 51 шинавусса адамина ур) гаманал цIунциартту дурну ур. Ва азарханалийн иян увну ур. Ва иширал хIакъираву материал рартIун дур.

ХIадур бувссар Андриана АьБДУЛЛАЕВАЛ

Пресс-конференция

Газ буцавил масъалартту ххал бивгъунни

Имара САИДОВА

«Къатри, аьршарал участокру машин ларсун, строительстволул къуртал дан дурашиврийн бунну, «Догазификация» программалулун буххан къабювхъусса инсантуран кумаг баву мурадрай, Аьрасатнал Президентнал ва программа чIумува къадуклакиминнувун рургун дур. Мунищун бавхIуну, газрал турба участокрачIан бияннин уква буцинсса сант ххишала хъанахъиссар. Агъалинал личIлачIиссар так цала къатравунмай буцлацисса газрахсса харжлугъ дулул.

2023 шинал программалул хъуну дур дахханашивуртту, кIулшивуртту дулаврил ва медициналул идараттачIангу газрал турбарду буцинсса. ХIакъинусса

Июльданул 5-нний «Дагестан» РГВК-лул редакциялий хъунни Дагъусттаннал энергетикалул ва тарифирттал министр Марат Шихалиевлул пресс-конференция. Шикку ххал бивгъунни «Социальная газификация» тIисса программалул масъалартту.

Ведомствалул хъунаманал бувсунни «Догазификация» программа чIумува къадуклакишиву.

къини хIисавравун ларсун дур газран кIанттай ттуки ва хъуручи ишла буллалисса 43 объект.

Марат Шихалиевлул бувсунни «Догазификация» программалул лагрулий газ буцавилхсса харжлугъ цуксса дуккантIиссарив.

«Къатрал заллухъруннал дулул аьркинссар чапарданучIату цала ужагъравунмай бувсусса газрахсса харжлугъ. Вай давурттахса аьмсса багъа хъар хъанахъиссар Газрал оборудованилхусса ва къатравун бияннинсса газрал турбардахсса харжлугърая. Дя-

нивну, сайки 30 азарда къуруш дацIлай дур къатравун бияннин газ буцавилх ва 70 азарда къуруш – газрал оборудованилхусса. Вай давурттахсса дянивсса багъа кIул бан бюхъайссар «Калькулятор» тIисса газификациялул оператортурал порталданийхчингу.

Марат Шихалиевлул бувсунни льготарду дагъайсса инсантуран льготал оборудованилхусса ва газ буцавилх бувсусса харжлугърахсса компенсацияртту буллай бушиву. Март зурул 1-нний байбивхъуну буссар газрал оборудо-

ванияртту машин ласунсса ягу къатравунсса газ буцавилх дулул арцу дакъасса льготниктуран компенсацияртту най буна буллай.

«Уттинин 44 инсаннал ишла дурссар вай льготарду. Программалул лагрулийсса выплата дулайссар цал, цурдагу ца объектрах. Выплаталул лагру дуссар 100 азарда къурушрайн дирсса», – увкунни министрнал.

Вай компенсацияртту, льготниктуран бакъассагу, багъайссар СВО-лул гурттучитурал кулпатирттан, Хъун дяввилул гурттучитурал ва шахъаннин, къинттулул захIмат буллай бивкIиминнал, ахIвал кIюласса кулпатирттан, цивипалул ливчIсса инсантуран, 1, 2-мур группардал мушакъатшиву

дурса инсантуран, мушакъатсса оьрчIру бусса кулпатирттан.

Марат Шихалиевлул кIицI лавгунни, Дагъусттаннал агъали «Социальная газификация» программалулун чялишну гуртту хъанай бушиву. Программалулун гуртту хъун региондалул агъалинал буллусса 6358 аьрзирава 976 аьрза махъунмай зана бивтшиву.

«Вай аьрзри къамул къабаврил багъана хъанай бур документру дузалну ва низамрай бакъашиву. Масалдаран, чIявуминнал дакъар къатрал ягу аьршарал заллушиву тасттикъ дуллалисса свидетельство. Му бакъассагу, хъунабакълай бур цаймигу масъалартту», – увкунни Марат Шихалиевлул.

Шиккува кIицI лаган, газификациялул программалулун гуртту хъунсса аьрзри булул бюхъайссар Госуслугарттал порталданийхчин, МФЦ-лийхчин ягу газификациялул оператортурал сайтрайхчин.

Цуссалакрал райондалия

Цуссалакрал райондалул цусса бакчи

Июндадул 4-ний Цуссалакрал райондалий хьунни администрациялул бакчинал бувчавуртту. Райондалул администрациялул бакчиталну бацан ччиминнал 6 кандидатуралува яла чйавуми чурду буллунни Хамзатов Мамати Бижаевичлулу.



Мамати Хамзатов увну ур 1960 шинал Цуссалакрал райондалийсса Цуссалакрал шяраву. 1983 шинал ванал кьуртал дурну дур СССР-данул КГБ-лул Москваулал лавайсса погранкомандный училищалул «Общевойсковой офицер с высшим образованием» тисса пишакаршиву, 1990 шинал – магъриб ма-

зурдил килшивуртту дусса каялувчигурал состав хладур байсса «Офицер с высшим образованием» тисса лавайсса курсу ва Аьрасатнал ФСБ-лул Академиялул «Юриспруденция».

Мамати Хамзатовлул захматрал ххулу байбихьуну бур 1979 шинал. 2016 шиналнин кьулдугь булла ивкун ур

Аьрасатнал ФСБ-лул органнаву. 2017 шинал зий ивкун ур Ухсавнил Кавказулал ФГКУ-рал Росгостройрал директорну.

Лайкь хьуну ур паччахилугьрал ва ведомствалул чулухасса наградарттан: Чувшиврул ордендалун (1999 шиналсса иширттахлу), «За заслуги перед Отечеством II степени» ордендалул медальданун ва «За военные заслуги» ордендалун. Ва ур

аьралий запасрал полковник.

Мамати Хамзатовлул бур кулпат ва шанма оьрчи.

Хьунмасса умуд бур Мамати Бижаевич райондалул агьалинай даки цуцисса, жяматрал мурадур буручлачисса, райондалул масъалартту килсса, жяматрачлан гьансса каялувчи хьунссар тисса.

Мюхчаншиврия

Зула ихтиярду дуруччаврил цланий

Ци зун аьркинссар, агана Цвила чулухуннай тлайла-дакьашиву дурсса, вила ихтиярду кьадурурччусса иш хьурча?

Хьхьичива-хьхьичи, мугьлат бакъа баян бан аьркинссар полициялул органнай. Мукунсса иширал хлакьиравусса аьрза чичин бучиссар ччимур чумал, МВД-лул кланттул органнай бувкун; официал сайтирдайчичин; телефондалийн 102 номерданийн оьвкуну.

Каних чивчусса аьрза булав бакъассагу, бучиссар оьвкуну бусангу.

Аьрзри кьамул байссар хьхьу-кьини кьаувкуну, виваллил иширттал кланттул органнал дежурная частьрай.

Виваллил иширттал органнал зузалтрал кьамул бан аьркинссар тахсиркаршивурттал хлакьиравусса ччимур аьрза, так МВД-лул кланттул органнал административ кьатрал кьатлув.

Закон кьадурурччаврил хлакьиравусса информация шаллусса бакъахьурчагума, кьамул бан аьркинссар. Хьумунил хьирив лаяву ва чаран лаякьаву – му полициялул давур.

Ци чулийгу, дакний битияра: цуксса мялмуну, балжину бувсрив зу зула хлакьазия, мунийн хьар хьунтиссар полициялул зузалал вил аьрзлул хлакьираву дурмунил хасиллу.

● Дакний битияра:

ца дакьасса аьрза бухьурча, мунил хлакьираву уголов дело сукку кьадантиссар;

полициялул органнайн бучарча, ккаккан бан аьркинссар зула ца-бакI дусса документ;

телефондалувах оьвтгий бухьурча, бусияра ца, фамилия, буттал ца, зува ялапар хьанакьисса адрес, телефон;

тлайлабакьасса аьрзлул хлакьираву уголов жавабрайн бучайссар;

тахсиркаршиврулу ягу административ тудакьашиврулу хлакьиравусса аьрза кьамул буллалийни, дежурная частьрай зухьхьун регистрациялул номерданушалсса аьрза кьамул бувшиврулу талон дулун аьркинссар;

аьрзлул хлакьираву ци хлукму бувсарив, чагьар чивчуну ягу электрон журалий, баян байссар аьрза бувманайн, му бувну 24 сьятрал даянив. Цумур бухьурчагу аьрзлул хлакьираву хлукму байссар уголов дело сукку дансса ягу кьадансса, ягу му аьркинсса органнайн тлайла буккансса;

зула аьрзлул хлакьиравусса информация ласун ва хасиллая кил хьун шайссар виваллил иширттал ягу му буллусса органдалул хьунаманачлан увкуну.

● Килну биклан:

агана зул аьрза виваллил иширттал органнайн багьлагьисса бакъахьурча, му тлайла буккайссар хасьсса федерал органнайн;

инсаннай уголов делойин

багьлагьисса тахсир ккаклакисса аьрза, му ххал бивгьусса хасиллайн бувну, судрайн тлайла буккайссар;

следовательнал ягу дознавательнал хлукмулушал ягу цайми иширтташал рязину бакъахьурча, зухь ихтияр дуссар мунил хлакьираву силестталул органдалул каялувчинайн ягу прокурорнайн буккан. Бюхьайссар судрайн булунгу.

Балики полициялул зузалал уголов дело сукку кьадарча, тахсир хьума жавабрайн кьаувцуну кьаличлантиссар. Бюхьайссар, аьрза судрайн булун аьркинсса иш биклан. Зула ихтиярду дуруччиншиврулу, виваллил иширттал органнайн аьрза булаврий гьашиву кьадурну, зувагу шаймур буллан аьркинссару.

Вичи дишин аьркинссар полициялул тудтимуних. Масала, квартиралува зат дарцусса иш бухьурча, мичча занай гьармунийн ка шилан кьабучиссар, цурку ашкара анмур хаварбакулий лиххан кьадан.

Агана хларамзадатурая телефондалийхчин зарал бивну бухьурча, телефондалий цукунчлавсса операцияртту мабувару, оьвтгий ивкманал номер кьабьяйкьин. Хьиннува хьинссар полициялул зузалт бучаннин му лешарча. Хьинссар, анаварну банкрайн оьвкуну, вила счетрацласса операцияртту блокировать дуvara учирча.

Уголов процесс ва судопроизводство наниссаксса халлай, зарал бивманахь ихтияр дуссар:

- тахсир хьуманай ци тахсир ккаклакиссарив килну биклан;

- показанияртту дулун, цайна, цала кулпатрайн ва гьанчуннайн кьаршисса личаннин.

- ниттил мазрай бусан хьуншиврулу уквасса таржумачи тлав ан;

- процессрал документирттал копияртту ласун;

- судрал инстанциярдай уголов дело ххал дигьлагьиний микку гьуртту хьун.

Цубутлуисса силестта кьуртал хьуну махь, зарал бивманахь ихтияр дуссар уголов делолул материаллашал кил хьун, документирттал копияртту бан ва панма ччимур мичча чичин. Мукунна ванахь ихтияр дуссар уголов делолул хлакьираву лавсун бувкисса аьрзардая кил хьун ва минуцун кьаакьлакьисса цала пикри чичин.

Балики, цува ягу гьанчунгьгал буллалисса кланттурду хьурча, цивппа буруччияра тисса аьрза чичин.

Судрал хлукму бувну махь, зарал бивманахь ихтияр дуссар мунишал рязи кьахьун.

Зарал бивманал, граждан искрайн бувну, мунал хьуслин ва дакнин бивсса зарал, мукунма силестталул давурттацун бавхлуну дан багьсса харжлулгь лахьан аьркинссар.

ДР-лул Виваллил иширттал министерстволул сайтрай

Хладур бувссар Андриана АБДУЛЛАЕВАЛ

«Буржлувссара жула аьралуннал чларав ацлан»

Цуссалакрал райондалул администрациялул бакчинал бигарду чумуйну биттур булла ивкисса Сулайман Рамазанов хьнаавкьунни хушрай СВО-лий гьуртту хьунсса контракт чирчусса Тлюхчардал шяравасса инсантурасал.

Хлакьинусса кьини Тлюхчардал шярава тамансса жагьилтал буссар Донбассулал агьали неонацизмалия мурахас буллай. Хасьсса операциялуву ххувшаву ласун ва цува хлакьсса патриот ушиву ккаккан бан лавгунни вай гьантрай Тлюхчардал шяравасса 54 шинавусса Буттаев Хиусмангу. Ванал исват бунни Ватан дуруччаврил цланий кьамул бувсса хлукмулул хьхьичи цичлар кьадацлайшиву.

Шиккува кици лаган, Хиусманнул аргу уссар мобилизация баян бувсса цалчинсса гьантрай шинай Запорожулал область-

рай хасьсса операциялуву гьуртту хьанай. Арс учланнин ацлансса мугьлат бакъа, ваналгу, ванал гьалмахтуралгу чларав ацлаву мурадрай, Хиусманнун пикри хьуну бур, контракт чирчуну, СВО-лий гьуртту хьун гьансса.

– Хлакьину ттул арс ур неонацизм дух дуллай, Ватандалул мурадур буручлай. Нагу буржлувссара жула аьралуннал чларав ацлан. Мунияту пикри хьунни, ттула арсангу, жула аьралуннангу чансса бунугу кумаг хьунссар тий, контракт чичинсса, – увкунни Хиусманнул.

Цана Хиусман ур СВО-лий



Хиусман Буттаев

кьизгьинну бита-ххитавуртту нанисса клантурдай гьуртту хьанай. Шикку ванал кумаграйнну шавурду дирми, ххассал бувну, нигьачлаву дакьасса клантурдайн бувцуну бур.

Укунсса патриотьтал буссаксса ххувшаву жула чулий душврийнсса умудгу, вихшалагу цлакь хьанай дур.

Уттигу ца жагьил хушрай СВО-лий гьуртту хьун лавгунни



Назим Темиров

Ялу-ялун чйаву хьанай бур СВО-лий хушрай гьуртту хьун ччисса жагьилтал. Вай гьантрай Цуссалакрал райондалия уттигу ца жагьил цува рязину, контрактту чирчуну, лавгунни СВО-лий гьуртту хьун. Ва ур Цуссалакрал шяравасса Назим Темиров.

Назим увну ур 1993 шинал Махачкьалалив. Повестка дучаннин кьаавцуну, ва лавгун ур военкоматрайн, цува СВО-лий гьуртту хьун ччай ушиву бусан.

Хлакьинусса кьини жула жагьилтал, махьаллил кьавхьуну, цала аьралий бурж лайкьну биттур буллай бур. Хасьсса аьралий операциялул цацун буллай бур, личи-личисса оьмурдал

аьралитал бакъассагу, контрактниктал, мобилизовать бувми ва укунмасса агьали.

Шиккува кици лаган, хушрай контрактру чирчуну СВО-лий гьуртту хьун лавгсса аьралитурангу дагьайссар мобилизовать бувминнан ккаккан дурсса Федерал ва региондалул даражалийсса цинярдагу халлихшиннарду.

Хладур бувссар Имара САИДОВАЛ

Виртгаврал аллеялий рай-
ондалул 14-гу фольклорда-
нул коллективрал тивтуну бия
халкуннал багъу-бизу, аьдату
ккаккан дуллалисса май-
данну. Фестивальданул бусрав-
сса хьамалну бия Комитаслул
цанийсса Ереваннал консерва-
ториялул ансамбль «Голоса Ар-
мении». Ва дур Мери Карапет-
ян каялувчисса студентьтурал
вокалданул ансамбль.

Бадрижамал АБЛИЕВА

Райондалул бакIчи Шамил
Рамазановлул, бусравсса хьа-
малгу, бавтIми цинявпагу дус-
шиврул ва фольклорданул бай-
рандалушал барчагу бувну, баян
бувна «Наследие» фестиваль
дайдихлахьишиву. Ванил дай-
дихьугу дурна райондалул шяра-
валлавацца фольклорданул кол-
лективиртгал.

Фестивальданул программа
сакин хьуну дия кIива блокрая:
«фольклорданул» ва «произ-
вольный номердал». Цалчинму-
ниву райондалул цачIундур кол-
лективрал ккаккан дурна хьатIул
аьдат. Ва давривух гьуртуну
бия «Бартукь» ва «Вихлидуш»
(мюрши душвавалмургу) фоль-
клорданул коллективругу.

Хьирив сахIналийн яргсса
ва авадансса программалушал
бувккуна «Голоса Армении»
коллектив.

Фестивальданул программа
гихуннай дачин дурна Респуб-
ликалул «Пагьламан» цанилусса

Ккуллал райондалия

Ирсирайсса дусшиврул ва культуралул байран

Июньдалул 4-ний Ккуллал райондалий Ваччав хьунни фольклор-
данул ва аслийсса культуралул «Наследие» цанилусса фестиваль.
Ва сакин дурну дия Республикалул Халкьуннал творчествовалул
кьатлул, Ккуллал райондалул администрациялул ва Культуралул
ва бигьалагаврил центрданул.



школалул – 1-мур ШувIуллал
шяравасса пагьламантурал.
Шикку, муданма кунма, бавтIми
хIайран бувансса номер ккаккан
бувна цIа дурксса Камил Мам-
маевлул.

Байран хьуна лавайсса да-
ражалий, райондалул агьали ва
ялун бувкIсса хьамал рязину
личIансса кушшуй.



Спорт

Чурттациял бизанттайх мотоциклетирттай



Заур Къушиев Шагьмардан Мудуевлуцал

Лаккуйгу ялу-ялун машгур хъанай дунуккар мотоциклетру ссур дуллалисса спорт. На уттигъанну чивчуссия Шуну-Зунттул бакИрайн мотоциклетирттай гъаз хъусса ШувкИуллал жагьилтурая – Камил Маммаевлуя ва Мурадлуя. Вана уттигу Чурттациял бизантту мотоциклетирттай мютиги бувсса цаймигу жагьилтал.

ПатГимат РАМАЗАНОВА

– Июньдалул 29-ний, Чурттахъун лавгсса ппурттуву, ттунгу, Исмаил МахИаммадов-лунгу хъунавкъунни жула шярвучу, Абдуразакълул арс Къушиев Заур. Ва мотоциклетрал экстремал спортрал мастер ур. Сисаврийну ва бюхулийну ванал жу хИайран бунну. Шярваллил бакИуя гилун неххачИангу увчИун, Чарттаарнил бизанттайн гъаз хъуна, Кичча, тамур чулухух хъуну, Сунув увчИуна, ялагу цИуница Гъаннаралу тIисса кIанттайн гъаз хъуна. Жу вас-щахлий ялугълай бивкIру цулулу-сагъну Заур зана хъунин. Зунттал ххулурдайх мотоциклет ссур дуван сисавугу, бюхугу, устаршивугу аьркинихха. Ахтгаяр махъ ва дуснашал НувцIаялу тIисса кIанттай цИунилгу бакИрайн гъаз хъуна, ххяларисса ххуллийх, зунттавух хъуну, КIувурдал чулийнай лавгуна. Заурдул ва ванал дуснал жун ва ххуллухъу чувшиву, сисаву ккаккан дурна. ЧIалай бия вай ххуйну хIадур хъуну бушиву, нигъ дакъа ссур дуллай бия мотоциклетру. Жугу, Заурдун укун нигъачIисса спортраву урувчуну икIан маслихатгу буну, тIайлабацIугу чIа куну, лавггу, – укун бувсунни жагьилтурал гъунардая профессор Шагьмардан Мудуевлул.

БакИрайва кIицI лавгсса куцуй, ва спортрал жура жагьилтурал дянив ялу-ялун машгур хъанай бухувкун, бучIия Лаккуй мотоциклетру ссур дуллалисса бьст-ччаллил тIуркIурдугу бунан.

Сивсусса шаттирду

Уттигъанну Орел шагьрулий хъусса Аьрасатнал регионна-ясса яла хъхичИун ливчуми спортсментал гьуртту хъусса армрестлинграл чемпионатрай цалчисса кIану бувгъунни жула лаккуьрчIал, МахИаммадшапинал арс Зураб ХIажиевлул.

Имара САИДОВА

Зураблул армрестлинграл спортрахун агъну тамансса шинну хъуну дур. Армрестлинграл Республикалул ва Аьрасатнал даражалийсса чемпионатирттай гьуртту хъуну, ванал уттинингу ккаккан бувссар цува ва спортрал профессионал ушиву.

Увну ур Зураб Хъуриев 1994 шинал. Хъуна хъуну ур Хъунайнал шярвучу. Зураблул нину-ппу бур Вихълиятусса. Нину Аьйша зий бур Хъунав школалий. Ппу – Гъумук ветуправлениялий. Хъунав къуртал буну бур Зураблул школагу, увххун ур Шярваллил хозьйствалул академиялулун (цIанасса М.М. Жамбулатовлул цIанийсса Аграрный университет). Дуклакисса ппуртту-



Зураб ХIажиев



вугу спортрал чулуха итххявхсса Зураблул, личИи-личIисса бьст-ччаллаву гьуртту хъуну, цала факультетрал цIа цимилгу бюхттул дурну дур. Академия къуртал буну махъ, Зураб дуклан увххун ур ДПИУ-рал физкультурный факультетрайн. ЦIана ва зий ур Аь. Аьлиевлул цIанийсса Олимпий резерврал спортшколалий армрестлинграл тренеру.

Зураб чIивинияцIава, лечин занай, турникрайн лахълай, пут личлай, спортрал бьст-ччаллаву гьуртту хъанай, хъинну итххявхсса оьрчI ивкIун ур. Шярваллаву сса жагьилтуран шагьрудайсса оьрчIан куннасса спортрахун багъансса шартIу чансса дикIай. Аммарив, зунттал шархъаву хъуни хъусса жагьилтал спортрахун багъсса, къянкъа-къурчIисса хасият дусса, цала хIарачатрайну хъхичИун ливчусса бикIай.

2013 шинал Зураб цалчин гьуртту хъуну ур МахIачкъала шагьрулул армрестлинграл первенстволий. Ца шинава гьуртту хъуну ур Дагъустанналмур первенстволий. Армрестлинграл хьиривми чемпионатру хъуну дур Москвалив. Аьрасатнаву хъусса чемпионатрай 4-сса кIану бугъаву асар хъуну, цIуница айивхъуну ур армрестлинграл спортрал даража гъаз буллай. Муния махъ, ца шинава, Дагъустаннал армрестлинграл первенстволий, хьирив Аьрасатнал первенстволий, яла Европанаву, Турциянаву хъусса чемпионатирттайгу бувгъуну бур 1-сса кIанттурду.

Армрестлинграл чемпионтурава язима увчIачIисса, Москва-

лив хъусса «Вершина» турнирданий 1-сса кIану бувгъуссар Зураблул. Ва хъанай ур дуняллул халкъуннал даражалул спортрал мастер.

Махъа-махъ ва ххув хъусса чемпионат хъуну дур Аьрасатнаву Орел шагьрулий.

БувчIачIисса зат бур хIакьинусса кьини спортраву, спортсменнал гъунардануцIун, итххявххаврицIун, чIарав бацIанмигу аьркинну бушиву. Гъарица ишираву Зураблул чIарав ацIлай ур ванал ппу МахИаммадшапин.

– ЦIана захIматсса чIун дуркIун дур. Жагьилтал ххуй бакъасса иширттаву хIала буххан къабитансса ца чаранну хъанай бур спорт. Вихшала дишин бучIисса, дакI тIайласса дусталгу хъунмурчIин бикIай спортрал ххуллийх нанисса. Уздансса бур жула лакрал миллатгу, жагьилталгу. Узданшиву ккаккан дурссар жула ппухъунналгу. Жувагу миннал кIану бугъан лайкъсса инсантал хъун буржлувссару. Сант диринну дунура барчаллагъ учин ччай ура ттула ххувшавурттая ххари хъусса, ттула чIарав бавцIусса цинявпагу инсантурахъ. ЛичИнува кIицI лаган ччай ура спортрал ххуллийсса иширттаву мудар кабакъу буллай, чIарав ацIлай ивкIисса уздансса лаккучув, МахIачкъала шагьрулул мажлисрал депутат Марис Илиясов, – тIий ур Зураб.

Цинявпагу спорт ххираминнал цIанияту чIа учинну Зураблун гихунмайсса бьст-ччаллаву тIайлабацIуртту.

Лакрал райондалия

Диндалул уссурвавран кумагран

Вай ларгсса бигъалагай Вькинирдай Шахъував Гъази-Гъумуча бивкIун бия имам МухИаммад Сулайманов бакIчисса чиваркI. БувкIунгу бия вай диндалул уссурвавран цIуну буллалисса мизитрал давурттаву кумаг баншиврул. Вайннавух бия лагма-шархъаясса имамталгу.

Бадрижамал АЬЛИЕВА

Вайннал кумаг бунни мизитрал кIилчинмур зивулдул чIиртту, минарет буллайна аьркин бантIисса чартту буххин, лавай гъаз бунан.

– Укусса давурттаву гьуртту хъун шаву – ва Бюхттулсса Занная жуйна ливксса хъунмасса цимир, – тIий ур имам МухИаммад.

Ялун бувкIисса хъамаллурасал ва кьини субботникрай гьуртту хъуна Адильгарай Аьлиев, Абдул Аьлиев, МухИаммад Сагидов, МахИаммад МахИаммадов ва цаймигу хIаласса шахъуймигу.



Хъинсса даврия махъ ахттайнсса хъиннура нахIуссар

Ва бусравсса давривух гьуртту хъанахъисса цинявннайавугу Аллагъ рязину лякъиннав. Амин.

«Горцы» фестиваль

Маданият

Зунттал агъалинал байран

Вай махъсса гъантрай Дагъусттанная хьуну бия Аьрасатнал регионнал ва чил билаятирттал творчествалул коллективирттал дянивсса культуралул диалограл майдан – шикку най дия Дунияллул халкъуннал дянивсса фольклорданул ва аслийсса культуралул XXI «Горцы» фестиваль.

Ванил лагрулий жулла республикалул хьуншагърулий ва махъсса муниципалитетирттай хьуна чЯрусса шадлугъру. Вайннул дайди ху дурсса «Каспий – дусшиврул зумарду» цанилусса фестиваль хьуна МахIачкъалалив ва Дарбантлив.

МахIачкъалалив «Каспий – дусшиврул зумарду» фестивалданул лагрулий хьуна «Тради-



ДР-лул культуралул министр Зарема Буттаева ва ванил хьиривчу Марита МухIадова «Горцы» фестивалданул гуртгучитурасал



ции народного костюма Каспия» тИсса байран-дефиле, Дарбантлив – «Дербент – перекресток цивилизаций» цанилусса концерт, Пагъламантурал байран, «Балай уча, аьшукъ» байран, халкъуннал канил пишардал мастер-классу ва выставкарду.

«Горцы» фестивалданул лагрулий Яруссаннал театрданул

хьхьичI хьуна халкъуннал творчествалул «Аьрасатнал чIурду» тИсса байран, Ленинул майданнив тIурча – «Халкъуннал аьдатру» цанилусса байран. Фестивалданул гъантрай най дия «Фестивалданул открыткартту» концерту.

Фестивалданий хьусса чIяру шадлугъирттаву дия «Русская

поляна» цанилусса оьруснал культуралул байран, «Фольклорданул шествие», «Жула Расул» литературалул марафон, «Ттул Дагъусттан – ттул Аьрасат» концерт ва м.ц.

Июньдалул 30-нний Р. ХIамзатовлул цИанийсса Национал библиотекалий ДР-лул культуралул министр Зарема Буттаева хьунабавкъуна «Горцы» фестивалданий гуртту хьуна хьисса коллективирттал каялувчитурасал ва вакилтурасал.

Шивува хьусса ккуркки столлал давурттаву хьуртту хьуна Беларусьнава, Монгьолнава, Аьрасатнал регионнаясса (Ухсавнил АьсатИннал, Къарачай-Чаргаснал, Къабардин-Балкъарнал, Ингушетиянал, Чачаннал, Ухсавнил АьсатИн-Аланиянал, Къалмуькънал республикарттаясса, Донецкалал Халкъуннал Республикалиясса, Астраханнаясса ва чIявусса цаймигу) творчествалул коллек-

Лак «Горцы» фестивалданий тивирттал каялувчитал ва устартал.

ДакИнийн бутан, «Горцы» фестиваль дуллалиссар Дагъусттан Республикалул БакIчинал, АьФ-лул Культуралул министрствалул, Аьрасатнал ПаччахIлугърал В.Д. Поленовлул цИанийсса Халкъуннал творчествалул къатлул, ДР-лул Культуралул министрствалул ва Республикалул Халкъуннал творчествалул къатлул чIарав бацIаврийну.

Концерту зунттаву

Дунияллул халкъуннал дянивсса фольклорданул ва аслийсса культуралул XXI «Горцы» фестивалданий гуртту хьун чил билаятирттая ва Аьрасатнал личИ-личИсса региона буювкъуна хьамал июньдалул 4-нний ппив хьуна жулла республикалул шяраваллаву ва шагърудайх, шиккугу концерту ккаккан дуваншиврул. Укун, жулла республикалул муниципалитетирттал агъалинашагу бюв хьуна фестивалданул гуртгучитал хьун, личИ-личИсса миллатирттал балайрдах вичИ дилин, къавтIавуртту ххал дуван, багъу бизулушал кIул хьун.

Куулал райондалий, Ваччав, мисалдаран, хьунни Армяннава-сса «Армяннал чIурду» цанилусса коллективу гурттусса концерт. Райондалул администрациялул бакIчи Шамил Рамазановлул, хьамаллурахь ча букругу куну, барча бовна циняв байрандалушал. Райондалул агъалинал хьун-масса гьирарай вичИ дирхьуна



хьамаллулрал цалва мазрай шаллу бовсса балайрдах. Ахирданий, концертрал хьуннасса ва авадансса программа шаллу хьуну махь, хьамакъабитулун кувннал кувннал бахшишру дурна, риршуна цачIусса суратру.

Казбековский райондалий

Дылым шяравалил Культуралул центрданий «Росстань» ансамблданул ккаккан дурна белоруссиянал хьатIул «Виселья» аьдат, къавтIавуртту, увкуна балайрду.

Сергокъалал райондалийн Мюере шяравун лавгуна Ухсавнил АьсатИннава хьамал – ан-

самбль «Амонд».

УнцIуллул райондалийн тIурча, лавгуна Белгородуллал паччахIлугърал филармониялул къавтIаврил ансамбль.

Буйнакский райондалийн – Ухсавнил АьсатИннава-

Ваччав

Аланиянава халкъуннал ансамбль «Апшърух».

Табасараннал райондалул агъалинал ва кьини хьунабавкъуна Луганскалал Халкъуннал Республикалиясса «Репсодия» цанилусса коллектив, Ахъушиял райондалий – Донецкалал Халкъуннал Республикалиясса «Фламинго» ансамбль, Хьунзахьиял райондалий Матлас шяраву – Башкортостаннаясса «Аманат» ансамбль, РутIуллул райондалий – Липецк шагърулиясса «Вера» ансамбль.

Хасаворт шагърулий Ингушетиянава, Къалмуькънава, Хакасиянава, Къарачай-Чаргаснава ва Чачаннава коллективругу гуртту хьуна «Культура в дружбе» цанилусса фестиваль. Ваний республикалул цайми коллективирттаву хIалану гуртту хьуна Шуссалакрал райондалиясса коллективу.

Гьарцагу муниципалитетрайсса шадлугъ хьуна яргсса ва дакIний личИансса, кувнная кувннан чIявусса затру кIул хьунсса, мюнпатрансса, дянивсса творчествалул ва дусшиврул арарду хьиннура цаьк дувансса.

Лажин хIадур дурссар
Бадрижамал АБЛИЕВАЛ



ИТНИ, 10 ИЮЛЬ

05.00 «Доброе утро». (12+).
09.00 Новости.
09.20 «АнтиФейк». (16+).

23.00 «Большая игра». (16+).
00.00 «Подкаст.Лаб». (16+).
03.00 Новости.

АРВАХИ, 12 ИЮЛЬ

05.00 «Доброе утро». (12+).
09.00 Новости.
09.20 «АнтиФейк». (16+).

ХАМИС, 13 ИЮЛЬ

05.00 «Доброе утро». (12+).
09.00 Новости.
09.20 «АнтиФейк». (16+).

НЮЖМАР, 14 ИЮЛЬ

05.00 «Доброе утро». (12+).
09.00 Новости.
09.20 «АнтиФейк». (16+).

21.45 Теоретический вечер А. Рыбникова. «Через тернии к звездам». (12+).

21.35 «Сегодня вечером». (16+).
23.05 «Леониду Агутину - 55». (12+).

РОССИЯ 1

ИТНИ, 10 ИЮЛЬ

05.00 «Утро России».
07.35-07.41 Вести-Дагестан
08.07-08.10 Вести-Дагестан

03.55 «Рая знает всё!». [12+]
05.00 «Утро России».
07.35-07.41 Вести-Дагестан

02.05 Анастасия Венедикова, Сергей Губанов, Сергей Рудневич, Виолетта Давыдовская

Анатолий Лобозик в телесериале «Сын». [16+]
23.15 «Вечер с Владимиром Соловьевым». [12+]

21.20 Дарья Урсляк, Антон Филитенко, Алексей Кортнев, Ольга Ломоносова

21.35 Вести-Дагестан
21.50 Торжественная церемония открытия XXXIII Международного фестиваля «Славянский базар в Витебске».

04.30 «45 секунд». [12+]
АЛХИАТ, 16 ИЮЛЬ
06.10 Светлана Тимофеева-Летуновская



ИТНИ, 10 ИЮЛЬ

07.00 Время новостей Дагестана. Итого
08.00 Мультфильм 0+
08.30 Х/ф «Барышня-крестьянка» 16+

04.00 «Угол зрения» 12+
04.25 Передача на табасаранском языке «Мил» 12+

АРВАХИ, 12 ИЮЛЬ

07.00 Время новостей Дагестана
07.20 Передача на лакском языке «Аьрши на агьлу» 12+

ХАМИС, 13 ИЮЛЬ

07.00 Время новостей Дагестана
07.20 Передача на даргинском языке «Адамити ва замана» 12+

НЮЖМАР, 14 ИЮЛЬ

07.00 Время новостей Дагестана
07.20 Передача на аварском языке «Паданги памалти заманти» 12+

ХУЛУЛУН, 15 ИЮЛЬ

07.00 Время новостей Дагестана
07.20 Передача на кумыкском языке «Халк ва заман» 12+

04.30 Передача на лезгинском языке «Вахтар ва инсанар» 12+
05.05 «Дежурная часть» 16+



ИТНИ, 10 ИЮЛЬ

05.15 Т/с «Возвращение Мухтара». (16+)
06.10 Д/с «Монументы Будущего за настоящими». (6+)

00.25 «Основано на реальных событиях». (16+).
01.20 Т/с «Внутреннее расследование». (16+).

АРВАХИ, 12 ИЮЛЬ

05.20 Т/с «Возвращение Мухтара». (16+)
06.10 Д/с «Монументы Будущего за настоящими». (6+)

ХАМИС, 13 ИЮЛЬ

05.20 Т/с «Возвращение Мухтара». (16+)
06.10 Д/с «Монументы Будущего за настоящими». (6+)

НЮЖМАР, 14 ИЮЛЬ

05.20 Т/с «Возвращение Мухтара». (16+)
06.10 Д/с «Монументы Будущего за настоящими». (6+)

19.00 «Сегодня».
20.00 Т/с «Ментовские войны». (16+).

19.25 «Секрет на миллион». (16+).
21.25 «Просто праздник!». (12+).

«Илчилул» календарь

Ва нюжмардий бувссар

Июль зурул 10-нний 1957 шинал увссар техникалул элмурдал доктор, профессор **Яраги Кьурбанов**.

Июль зурул 12-нний 1936 шинал увссар жяматийсса ишккакку, журналист **Иззат Аьлиев**.

Барча бавуртту



Вай гьантрай хьусса бувчавурттай Цуссалакрал райондалул бакЧину увчунни ТтурчИиял шяравасса **ХАмзатов МаматИ Бижаевич**.

ДакИнийхтуну барчагу уллай, чIа тIий буру МаматИин ва жаваблувсса кьуллулгьрал бигарду шаллу булансса цулушувугу, каша-кьудратгу, гьавасгу. Ина райондалул жяматрацун, ми вицун бакыннав. Вил ша барачат хьуну, райондалий аргъ дизаннав. Бюхьлай личаннав.

Вил хIурмат бусса ТтурчИиял жямат

Вайннан циняв ххуллурду тIивтIуну буссар

Дуклаки оьрчIал 11 шинал лажиндарай бусса захIмат вайннал лайкь бусса марцIсса ххювардайсса аттестатирттал ва мусил медальдал тастгикь буллай бур. Гьашину мусил медальданий школа кьуртал бунниннавасса ур **ЧIуртташиял шяравасса Мирзал арс Амирхан МахIаммадов**. Амирханнул кьуртал бунни МахIачкьала шагьрулул 3-мур лицей.

Имара САИДОВА

Шиву дуклакисса шиннардай Амирханнул, унгу-унгуну ЕГЭ-рдайн хIадур хьанай, дарсру лахьлай, хьунмасса захIмат бивхьунни. Хаснува 9-11-ми классирттаву, лицейравусса дуккаврий гьашиву кьадурну, ххишаласса кIулшивуртту ласунсса хIарачат буллай, бакI гьаз дансса чIун дакьа дуклай ивкIунни. ХIасил, хIарачатран – барачат. КуртIсса кIулшивуртту ласаву мурадрай цала хьхьичI бивхьусса хиял бартлаган бан бювхьунни жагьилнаша. Укунсса выпускниктурал хьхьичI тIитIлай дур ччимур вузравунсса нузру. Вайннайни хьар хьанахьисса билатрал бучIантIимур.

Амирхан ур дуккавривугу, спортравугу хьхьичIунсса оьрчI. Ванан хьинну ххирар личИличIисса луттирду ккалангу. Лицейраву ГТО хьхьичIунну дулаврихлу ва лайкь хьуну ур ДР-лул Спортрал министерствалул чулхасса мусил медальданугу.

Амирханнул дуклан уххан язи бувгьунни цала татталгу кьуртал бусса М. В. Ломоносовлул цанийсса Москвауллал паччахIулгьрал университет.

«Ттул таттал, Магьдинал, ва вузраву 1983 шинал дурурчуссия кандидатнал диссертация. Ттун хьинну ххирая ттула татташIал МГУ кьуртал бусса, чIявусса затру кIулсса выпускниктурах вичИ дихьлан. Вайннай ттун чIявусса тамашасса затру кIул шайва. Мунияту ттунгу МГУ-равун уххансса гьира багьуна.

Лицейраву ккалай ивкIсса шиннардай лавхьхьунни ттун хьхьичI бивхьусса пикри-хияллу бартлаган булан, иш багьсса кIанттурдай, пикригу буну, тIайласса хIукмурду бул-



лан. Бувчунни, ччан бикIарчан, инсаннаша дан кьабюхьайсса цичIар дакьашиву. Барчаллагь тIий ура жухьра дарсру дихьлай бивкIсса цIанихсса преподавательтурахь», – тIий ур Амирхан.


КIишI лаганна Амирхан буттал кIанугу, лакку мазгу ххирасса патриотту ушиву. Цува шагьрулий увсса, хьуна хьусса унагу, ванан хьинну ххирар буттал шяравалу, ЧIуртташиял шар. ОьрчIнийва зунттаван занай аьдат хьусса Амирханнул хIат-хIисав дакьа ххирар буттал шяравунмайсса аьрххирду, вайннал кулпат чьачьяни лагайссар Лаккуйин.

«Зунттурдайн я шайхту, дакI ххарисса асардал видуцай. Лакку билаттраяр рахIатсса кIану цамур бакьассар. Зунттавусса ЧIуртташиял шяраву дуссар жул буттахьал кьатри. Ци дуссар дуниялий жулва зунттаяр, ардаяр илкинсса. Каникуллу дучIаннин ялугьлан икIайссияв ттула буттал шяравун иян. Игьалагара так зунттаву», – буслий ур Амирхан.

ЧIа учинну Амирханнул гихунмайсса оьрмулу хьунисса тIайлабацIуртту.

Жулла жагьилсса ник

Мусил медальданий кьуртал бунни школа



Гьашину МахIачкьалаллал №39 школа мусил медальданий кьуртал бунни жула лаккуоьрчI ХIажиев Юсуп Зураб-лул арнал.

Цалчинмур классрая шихунай Юсуп дуклай ивкIун ур лавайсса кьиматирттай. КIулшивуртту дусса, итхьявхсса оьрчI гьан айсса ивкIун ур циняв дарсирдал олимпиадарттайн ва бугьайсса бивкIун бур хьхьичIунсса кIанттурду. Му бакьассагу, Юсуп чIивинияцава спорт ххирасса, личИ-личИсса журардал спортрахун агьсса оьрчI ивкIун ур. Школалий дуклакисса шиннардай ва занай ивкIун ур А.Карповлул шахматирттал школалийн, каратэлул, боксрал секциярайдан. ЛичИличИсса бьест-ччаллаву гьуртту хьуну, хьхьичIунсса кIанттурду бугьайсса бивкIун бур. Школалий дуклакисса шиннардай ва-

нал лайкь дурну дур цимирагу хIурматрал грамота.

Юсуп ур мяьрипат дусса, жаваблувсса, дакI хьинсса жагьил.

Ванал ппу Зураб Хьурттал шяравасса ур. Ва Гьумучиял РЭС-рал хьунаману ур. Нину Икрема бачИ Гьумуча, бачИ Ккурклия бур. Ва зий бур МахIачкьалалив нотариуснал кумагчину. ЧIивима уссу Хайруттин ХIажиев 9-мур классраву дуклай ур.

Юсуплун, цала буттал буттал ппу, цIанихсса хIакин, аьлимчу, профессор ХIажиев Хайруттин Эфендиевичлул шаттирдайх ачин, медициналул вузравун уххансса пикри бур. Шак бакьар, ваная цала цIанихсса агьулданул ирс лайкьну буручинсса жагьил хьуншиврий.

Цинявпагу хияллу ва дакIнийсса мурадду бартлаганнав. ТIайлабацIу хьуннав.

Гьашину Москвауллал №1164 школа мусил медальданий кьуртал бунни жула лаккудушнил – КIундиннал шяравасса Исаял ва Аьйшатлул душ Хьунбуттаева Маликатлул.

Москвауллал школа мусил медальданий кьуртал бан хьунмасса бюхьугу, хIарачатгу аьркиншиву бувчIлачИсса зат бур. Цалчинмур классрая байбивхьуну, Маликатлул цинявпагу классру марцIсса ххювардай кьуртал буну бур. Дуклакисса шиннардай, оьрус мазрал, литературалул ва цаймигу дарсирдал олимпиадарттай гьуртту хьуну, грамотартту ва бахшиш-ру ласайсса диркIун дур. ЕГЭ-



гу ванил, цуя-ца репетитор кьавгьуну, цила хIарачатрай, цила кIулшивурттай дулуну дур.

ДакIнийн бутан, цаппара шиннардай хьхьичI Маликатлуя «Илчи» кказитрай чивчуну буссия. Та чIумал ванил Москвауллал школарттал дуклаки оьрчIал дянвивсса Совет Союзрал Виричув Надежда Трояннул завалунсса спартакиадалий, ттуплий буккаврил бьест-ччалливу, цалчинсса кIану бувгьуссия. КIилчинсса кIану бувгьуссия Маликатлул цала школалий баян бусса «Варвара – краса, длинная коса» тIисса конкурсрайгу, цила лахьисса хIаллурду ккаккан буну. ХIайп, утти мигу ванин кьукьин багьну бур.

Маликатлул журналистнал пиша ххуй бизлай бур. Ваниву му чулухунмайсса гьунаргу бур. Амма журналистикалийн хьинну хьунмасса конкурс дур, льготникталгу чIявусса бур тIий, бурруккинтгарай бур. Ванин ххюва вузравун документру булунсса пикри бур. ЧIа учинну жула лаккудушнин тIайлабацIу. ДакIниймур бартлавгун ххари баннав.

Анриана АьБДУЛЛАЕВА



Лавайсса баллу

Вай гьантрай Цуссалакрал райондалул школарттай хIасиллу дунни химиялул, литературалул, географиялул ва оьрус мазрал ЕГЭ-рдал. ЧIявуминнал вайннува дулуну дия химиялулмур экзамен. Химиялул ЕГЭ дулусса выпускниктурава 5-ннал лавсун бур лахьсса баллу.

Имара САИДОВА

Химиялул ЕГЭ-лий 95 балл лавсун бур Чапаево шяраваллил 2-мур школалул дуклаки душ Сабина Давдиевал, 95 балл лавсун бур Цуссаккуллал 2-мур школалул дуклаки душ Шуанат Алхасовал, 90 балл – ЦуссачIуртташиял 2-мур школалул дуклаки душ Ххадиджат Расуловал, 86 балл – Цуссаккуллал 2-мур школалул дуклаки оьрчI МахIаммадхан

МахIаммадовлул, 82 балл – Гьамияшиял школалул дуклаки душ Ххадиджат Парамазовал.

Цуссалакрал райондалул кIулшивуртту дулаврил идарарттагьсса 28 выпускникнал 80-нния ливчусса баллу лавсун бур оьрус мазрал ЕГЭ-лул. Ва дарсирал ЕГЭ-лул лавайсса баллу лавсун бур Гьамияшиял 2-мур школалул 1 выпускникнал, Гьамияшиял школалул 3 выпускникнал, Цуссаккуллал

2-мур школалул 7 выпускникнал, Цуссалакрал гимназиялул 8 выпускникнал, Цуссалакрал 1-мур школалул 3 выпускникнал, ЦуссачIуртташиял 2-мур школалул 2 выпускникнал, Чапаево шяраваллил 2-мур школалул 2 выпускникнал, ДучIиннал 2-мур школалул 2 выпускникнал, Шущиннал школалул 1 выпускникнал ва Ямансуйннал школалул 1 выпускникнал.

Оьрус мазрал экзамен дулусса цинявпагу выпускниктурал ккаккан бунни орфоэпиялул, лексикалул, морфологиялул, синтаксисрал ларайсса кIулшивуртту душиву ва цанна оьрус мазрал кьанунну ххуйну кIулулу душиву.

Юбилейран хасну

Занналва гьунар ххину ляхъан бувмур

Июльданул 1-нний Лакрал театрдану хьунни Дагъусттаннал халкъуннал артистка Жинасат Динмамамадовал 75 шинал юбилейран хас бувсса мажлис. Ва бачин бувну ия Дагъусттаннал халкъуннал артист Аслан Мамамадов.

Имара САИДОВА

Жинасат Динмамамадова барча бан бувкун бия ДР-лул культуралул министрнал хьиривчур Мурад Хабибов, Дагъусттаннал Театрдал ишккакултрал союзрал отделениялул председателна хьиривчур Байсолтан Осаев, АФ-лул культуралул лайкъ хьусса зузала Качар Хусайнаева, Цуссалакрал райондалул Культуралул управ-

гьусса пьесардавасса видеортту. Мукунма сахналий ккаккан бунни Жинасатлул роллу дургьусса спектакльлавасса парчри.

Артистка юбилейрал мажлисрай исват хъанай бия ва тлабиятралва буллусса гьунарданул заллу бушиву.

Жинасат Динмамамадовал гьунарданун лавайсса кьимат бишлашисса ихтилат бунни Качар Хусайнаевал. — Жинасат Аьрасатнал ар-



Жинасат Динмамамадова



лениялул хьунаманал хьиривчур Заур Мамамадов ва цинявпагу Жинасатлул творчество ххирами.

Жинасат Динмамамадовал творчествалия гьарта-гьарзану бусласисса ихтилат бунни Аслан Мамамадовлул.

— Жинасат Динмамамадова бур захматрал инсан. 17 шинаву бувкун бур ва театрданувун. Шихачлав кьалавхьусса гьунар бусса, ккаккангу ххуйсса душ чьясса мутталай ххира хьуну бур тамашачитурал. Хакьинусса кьини театрдануву зузисса жагьилсса артистурал ва бур насихатчигу, гьунар бусса, эбратрансса артисткагу. Ванил гьарицагу сахналийн буквавур дур цу бусса. Жинасат Динмамамадовал цимирагу шинал лажиндарай, лахьисса творчествалул ххуллий, жула культура машгьур давриву буниялагу хьунмасса бутла бивхьуссар. Ва мудангу тамашачитурал дянив ххирану ва кьиматрай буссар. Жинасатлул творчествалунсса яла бюхтгумур кьиматгу бур архал узиминнан ва тамашачитурал бусарву ва ххирану бушиву, — увкунни Аслан Мамамадовлул.

Ихтилатирттал, балайрдал лях-карах сахналий ккаккан дунни Жинасатлул роллу дур-

Жинасат Динмамамадовал юбилейрал мажлис чюлу бунни, гьаз дунни мунил сий Лакрал театрданул артистгтурал. Цаннаяр ца гьунар бусса артистгтурал лавайсса даражаллий тлайла дурккунни Жинасатлул юбилей.

тистгтурал даражалийсса гьунар бусса артистка. Ванил тай киноравусса артистгтурар цимивагу даражалул ларайну ва усттарну роллу дугьан бюхъайсса бушиву ккаккан бувссар. Ххишалдаран, ванил гьунар бур балай учавриву, балай учайсса буну тий бюхьуссар ванил чюгу сахналий гьалгьа тлутисса чюмал ххишала бакъа тлаансса, ччимур журалул асарду тамашачитурал биян бан бюхъайсса.

Жинасат, вил пиша захматсса пиша бур. Цанчирчан, хакьину ина ккаклай бура, вил ххуйшиврия, гьунардания гьалгьа тий бур, гьунттий ина, ккаккан кьабивкун, хьамабитлай бура. Артистнал пиша мукунсса

бур. Ина буниялагу хьунмасса гьунар бувссар вила миллатрал хьхьич, багьа бакъасса бахшиш дурссар лакрал миллатран, ина ккаккан, вила хьирив Лакрал театрданувун ххуйсса, жагьилсса артистгтал буклакИи бувссар. Ина бувмур лакран хьамабитан кьабучиссар. Ина я хьунисса бахшишртгах, ягу барчаллагьиртгах зий бакъаяв, ина бив вила дакинвусса ххазина миллатрал хьхьич бихьлай. Ттун хьинну асар хъанай бур хакьину ина вила пиша кьабивтссар, вания тихунмай кьабуккантиссара тисса ихтилатру. Кьаччива мукун, ина му даражаллийн уттигу биян бува, ччива вания тихунмайгу, ттинин кунма, лакрал тамашачитал махаттал булла. Дулуннав вихьхьун мукунсса каша, — увкунни Качар Хусайнаевал.

Жинасат Динмамамадовал юбилейрал мажлис чюлу бунни, гьаз дунни мунил сий Лакрал театрданул артистгтурал. Шиккува кийиц лаган, цаннаяр ца гьунар бусса Лакрал театрданул артистгтурал лавайсса даражаллий тлайла дурккунни Жинасатлул юбилей.

Ахирданий, цила мажлис хьун бан бувкисса цинявпагу хьамаллурахь барчаллагь тлутисса ихтилат бунни Жинасат Динмамамадовал.

ИЗЗАТ АЬЛИЕВ

«Расуллучла ккурчлав» тисса луттирава



Иззат Аьлиев Расул Хамзатовлуцал

«АбутГалиблуд увкуна»

Расул Хамзатовлул «Ттул Дагъусттан» тисса луттиравух ппив бувну бур буниялагу, хьярчирайгу бувссса аькиллсса махьру, ми буллуну бур учалартал, лувлякьурттал, афоризмардал журалий. Ми цивпагу чявуну буллуну биклай «АбутГалиблуд увкуна» тисса калималул хьирив. АбутГалиб мийжаннугу ия хьинну мукьун усттарсса инсан, ччарча шайир хисаврай, ччарча ихтилатрал уртакъ хисаврай. Амма «АбутГалиблуд увкуна» тисса цимурца мийжаннугу АбутГалиблуд увкусса бакъассар.

Къапихъал Апанниналгу Стлал Сулайманнул оьрмулул ва творчестволу хлашийлий халкъуннавасса аьшукьнал гьайбат ккаккан дурсса кунна, Расул Хамзатовлулгу литературалулун увцуну ур аькьлукарсса кьужа-киши, гьарца ишираву гацана цала хуржинттава аькьилсса махь личин байсса. Масалдаран, «Ттул Дагъусттан»-далува, «чичул ва издательнал» диалогран яргну кьямаядьясса куц бучан бан, Расуллул буллуну бур «АбутГалиблуд издательствалийн гьан бувсса чагьар»:

«Хурмат бусса Дагъусттаннал издательствай! На ура зул халкъуннал шайир, Дагъусттаннал Верховный Советрал Президиумрал член, персональныйсса пенсионер. Гьашину ттун бартлаглай дур мийшалай ххиора шин. Ттун кюлли, агарда ттун ца бакъамур хьуну, на накьлу хьурча, зу хлукму бантиссар ттул кива томрайсса лу дуниялийн буккан бан. На зухь миннат буллау ура цанава ттул ца лу итабакьин, яла, на ивкуну махь итабакьинтисса кива томран канай. Ва ссалам. АбутГалиб».

Гьай-гьай, зунгу бувчлалачиссар му чагьарданул автор цури.

Цанма АбутГалиблуну му зат ххуйну куну бивкиссар, цалагу му хьярчийну кьамул байсса бивкиссар.

Ча, цал, Дагъусттаннал Чичултрал союзрал правлениелий Расуллул бувсса ихтилатрал хьирив АбутГалиб ивкун ур, ссаятурив рязи акъа, цавува цува ссирсилттавун мур-мур тий.

Расуллул цювххуну бур, АбутГалиблуд ци увкур куну. Ганал царав шайивкисса ОьмарХажо Шахтаманов айивхьукун:

— АбутГалиблуд увкунни... — тий, га АбутГалиблуд аьличан увну ур:

— Ппадажди, ОьмарХажо, ппадажди! — хилакарсса пиш увкуну бур АбутГалиблуд. — Расул тий ур: «АбутГалиблуд увкуна». Ина тий ура: «АбутГалиблуд увкунни». Утти ина Расуллухь уча: «АбутГалиблуд увкунни: на нава учинна!» — куну.

Микку циняв правлениелий буми рязину хьан бивкун бур.

Кьалмакъал

Цал Расуллул кабинетралун, тачлав акъачин гьалакуну, увххун ур укуна паракьатсса, увцу-кьувцуну хлалимсса Аткай. Хьавххун ур, ваца бур хьавхьайсса кунна, кабинетрал залунная цирив тлав буллун ивкун ур, кару-каругу дулла, чьш уккавил лажингу гьухьал кунта тий, чурххайсса гьухьагу чьт хьуну.

— Ява, на му зат мукун кьабитайссар! — Расул ни гьай ихьлай, — Винма ччи-ччимурду буллун бучисса ххай маиклара! — тий.

Расул гьанавихи хьуну, «хьамаличу» паракьат уллан ивкун ур, амма «дискуссия» нани ххуллий чюгу кьанкьа бувну, утти цувагу ялун бигьлан ивкун ур. Увкун чичрулул столданухагу, карукару дуллун ивкун ур, циваннив канихьсса кьаламгу куту-кусу булла.

— Нания вихь учав, хьирив лаянна куну, ина турча, шиккун увкун ура дяван, кьалмакъал дан, — авчуну ур Аткай чулийнай. — Гьу, ачу туну, дявануча!

— На так дявааврийну гьашиву дансса ххай маиклара! — ух хьун кьавкун ур Аткай. — Ява на... — хьугьу бахчуну, авцуну ур. Мунийну «талатаву» кьуртал хьуну дур...

Пашагу тий, киягу кантай шьавкун бур. Кьалмакъалданул савав ттунгу, ОьмарХажинангу куну хьунна, Аткай, чьйгу хлачан улул, шавай тлайла увкун махь. Хьумунил савав диркун дия чичултрал кьатраву квартиратту бачлаврицун дархусса бувчу-кьабувчулуву.

Микку ОьмарХажинал мабулара Расуллухьхьун чявуклулсса суал:

— Ацула, зу киягу шикку бивссания, цумая ххув хьунтима?

— На Аткай автссания, цинявнал тунтиссия: «Расул авлия хьуну ур — кьужри батлан ивкун ур». Агана ганал на автссания, хьиннува оьккуну хьунсия: «Бурги Расул чун ивну урив — кьужрал атлатисса даражаллийн агьну ур». Ча, ци чулийгу ух хьунтима наяв.

Таржума. Р. Эльдаровал



«Расуллул Аьрасат»

Расул Хамзатовлун 100 шин шаврил лагрулий шалвагу Аьрасатнаву, жулла республикалийгу дуллай бур личи-личисса шадлугьру. Вайннувацца ца хьунни вай гьантрайгу – культуралул аьдатиртгал регионнал дянивсса форум «Расуллул Аьрасат» («Россия Расула»).



Бадрижамал АБЛИЕВА

Республикалул хьуншагьрулул хьун майданнив июндадалу 26-нний хьуна форумрал гала-концерт. Форумрал гьуртгучитуряхь ва хьамаллуряхь ча букру тисса ихтилат бунна Махачкьала шагьрулул бакчи Юсуп Умавовлул. Цалва ихтилатраву ванал чурчав дурна Расул Хамзатовлун 100 шин хьанхьаврил лишандалулу нанисса 2023-ку шин дагьусттанлувтуран ва дагьусттаннал культуралул яличисса шин душиврий.

Гихуннай хьусса концертрал программалул лагрулий сахналийн бункуна жулла республикалул ца дурксса балайчитал, Махачкьала шагьрулул Культуралул управлениялул Оьрчал филармониялул солистгьтал, республикалул шагьрурдаеясса ва районнаясса, СКФО-лул регионнаясса творчествалул коллективру.

«Расуллул Аьрасат» форумрал лагрулий ва кьини мукунна хьуна «Махачкьала – культуралул шанбачу» тисса концерт,

«Жула Расул» тисса акция-концерт, патриот журалул балайрдал «Журавли над Россией» тисса байран, «Устартурал шьравалу» тисса выставка, «Читаем вместе» цанилусса литературалул марафон, «Наследие Расула Гамзатова – завещание потомкам» тисса ккуркки стол. Вай шадлугьирттай гьурту хьуна республикалул творчествалул хьхьичунни коллективру ва халкьуннал канил пишардал язими устартал.

Форумрал лагрулийсса шадлугьру хьуссар Махачкьала шпгьрулуцунсса поселокирттайгу: Шамхаллай, Талгилий ва Цусса Хушетрай.

«Расуллул Аьрасат» форум хьуссар «Аьрасатнал культуралул фонд» ООГО-рал грант ишла дурну, «Культура» Национал проектрал «Творчествалул инсантал» Федерал проектрал лагрулий, ДР-лул Культуралул министрствалул, Махачкьала шагьрулул администрациялул ва Культуралул управлениялул, Республикалул Халкьуннал творчествалул кьатлул чьарав бацлаврийну.

Чивисса оьрмулий шанна мусил медаль

Вай гьантрай, М.В.Ломоносовлул цанийсса Москвауллал Впаччахьлугьрал университет лавайсса даражалий кьуртал буну, Ятлул диплом ва мусил медаль ларсунни Ккурккуллал шьравасса Камиллул душ Карина Хажиевал.



Камил нину Элеонорачал



Аьбдурашид Хажиев

Адриана АБДУЛЛАЕВА

Карина цила нитти-бутташал Москвалий ялапар хьанай буссар. 2019-ку шинал ванил Москвауллал школагу мусил медальданий кьуртал бувссия. Медальгу кира ларьссия: ца – школа лавайсса кьиматирттай кьуртал буну тий, цагу – ЕГЭ-дай лавайсса баллу (220-нния ливчусса) лавсун тий.

Кичи лаган, Карина чьывучин хьуйну килусса, MMA-индустриялулу ца дурксса промоутер, FIGHT NIGHTS лигалул генеральный продюсер Камил Хажиевлул душри. Каринал гьунаргу, буюхь-хьитгу цила нитти-буттая ва бава-тгьатта ирсирай бивсса буюхьунссар. Цила чумал Камиллулгу Москвауллал школа мусил медальданий кьуртал бувссия. Хажину ва ци даражалул инсан уссарив гьарнан килли. Каринал бава-тгьаттагу шьраву бусравсса агьлу-авладрайсса дурккусса инсанталли. Кьадинахьал Хажинал арс Хажиев Аьбдурашид тарихрал элмулуву агьамсса ахттаршиннарду дурсса алимчуври. 1963-ку шинал дурурчуссар тарихрал элмурдал кандидат хьунсса диссертация. 1967-ку шинал хьуссар тарихрал элмурдал доктор. Шьяпинал душ Элеонора Хажиева хьакин-терапевт бур. Сайки 50 шинай зий бивкиссар Москвауллал Элмурдал академиялул азарханалий. Аьбдурашидлул ва Элеонорал буттахьулгу шьраву махь нанисса, хурматрайсса инсантал бивкиссар. Кивагу чулухасса агьлу-авладраву алимтал чансса бакьассар. Укунсса мархри бусса душнил гьунарданийгу, хьхьичуннайшивурттайгу цуцлав махлаттал кьахьунссар.

Буниялагу, Карина гьарица чулуха итхьавхьсса душ бур. Ва лахлай буссар лезгинкалий бизан «Ансар» тисса ансамбльдану. Каринал марцуну килли ингилис маз, махьсса 7 шинай лахлай бур китаи маз, уттигьанну турча, испан мазгу лахлан бивкунни. Шак бакьар, Каринал тиния тихунмайгу циятува баян баншиврий.

Жуварив ванин чьа учинну так тьайлабацуртту ва хьхьичуннайшивуртту.

Ятлул диплом лавсунни

Гьашину Москвалив РМАНПО-лул (Российская Медицинская Академия непрерывного профессионального образования) ординатура лавайсса кьиматирттай кьуртал буну, Ятлул диплом лавсунни жул зузала Адриана Аьбдуллаевал арс Аьбдул Мисрихановлул. Жула коллегахь барчагу тий, кутгану бусанну Аьбдуллуя.

Имара САИДОВА

Увну ур ва 1996-ку шинал сентябрь зурул 21-нний Бархьаратусса Аьлил ва Ккурклиясса Адрианал кулпатраву. Хьакиннал пиша Аьбдуллул школалий дуклакниива хьуй бизлай бивкун бур. 2014 шинал Махачкьалалал №28 школагу кьуртал буну, увхун ур Дагьусттаннал медициналул университетрал лечебный факультетрайн. Дуклай унува, зий ивкун ур Н.М. Кураевлул цанийсса Республикалул оьрчал чьару профиллу дусса азарханалий, реанимациялул отделениялий. Шалагу дуньялий корона-вирусрал инфекция сукку хьусса чумал, 6-мур курсрай дуклакисса Аьбдул зий ивкун ур ковид-госпиталлай Ятлул зоналий.

Захьматсса, цала оьрмулун ва шулушиврун ниьгачьаву дусса шартирдай зий бивхьусса захьматраху лайкь хьуну ур Да-

гьусттаннал Бакчи В. Васильевлул чулухасса Барчаллагьрал чагьарданун. Дуккаву кьуртал дурну махь ца шинай Аьбдул зий ивкун ур Москвауллал областьрайсса Красногорск шагьрулул поликлиникалий.

Ца шинава цала хьарачатрайну увхун ур РМАНПО-лул бюджетрал ординатуралулун, офтальмологиялул отделениялийн.

Дуклай унува, зий ивкун ур Москвауллал Шулу-сагьшиву дуруччаврил департаментрал №45 поликлиникалий.

Шиккусса ккаккиарттаху лайкь буну бур Москвауллал мэр С. Собяниннул чулухасса Барчаллагьрал чагьар. Цала язи бивгьусса пиша куртуну лахлай, Аьбдул занай ивкун ур С.П. Боткиннул цанийсса азарханалийн. Шикку канилух дурккун дур хирургиялул практикагу. Дежурствартай ва чьывуну хьунаакьайсса ивкун ур экстренный иширтташал. С.П.



Аьбдул Мисриханов

Боткиннул азарханалийн ванал килушивурттугу хьиннура курт хьуну дур, давуго канилух дурккун дур. Шак бакьар, цала пиша хьирасса ва жаваблывшинна дусса жагилсса хьакинная, ванал хьхьичуннайшивурттая жунма уттигу балланшиврий.

Гъаваллавун гъаз хъусса ЦувкӀуллал барзу

ПатГимат РАМАЗАНОВА

Карттул чатӀушал ва цаймигу ссайгъатиртташал, ватандалул кьанкь дусса, шалва зал янхъа тӀутӀи бувсса, ЦувкӀуллал бизанттая риртгусса тӀутӀал чӀапрашал ялун бивуна ЦувкӀратусса делегациягу. Хъунмасса зал шапӀ куну бувцӀуну бия. Мугъали хъуну, ца лахӀзалул мутталий агъалинал дастга-дасттарду дарчуна гъар чулуха залданувун. Вайксса чӀявусса агълу кьабатӀинххива, шиккува, Каспийскалий, яхънахъисса цӀувкӀул батӀанххива тӀий, бакӀрайва барчаллагърай ия ва мероприятиялул сиптачи, Камиллул ниттиссу Ибадуллагъ Даниялов. Мажлис бачин бивну ия Дагъусттаннал культуралул лайкь хъусса зузала, цӀанихъсса тямата Супиян Омьмаров. Ванал кӀицӀ лавгуна, цӀунилгу ЦувкӀуллал пагъламантурал цӀа бюхттулну гъаз дуршиву Камиллул.

Шярваллил Жяматийсса советрал председатель, профессор МахӀаммадбаг ХӀусайхановлул увкуна: «ЦувкӀуллал шярваллил цӀа машгъур дурмур, дунялийх ппив хъун дурмур пиша хъанай бур пагъламаншиву. ЦувкӀуллал пагъламантурал кьабивсса билаят бакъассар, гъарца кӀанайгу пагъламантурал гъунардан лавайсса кьимат бившуссар. Амма ца ппурттуву, шярраву пагъламантурал фестиваллугу кьадуллай, цувкӀуллал искусство духлаглагисса кунмасса иш бия. ХӀатта, пагъламаншиврул гъунардун ягин баншиврул, оьрчӀан пагъламан лахъан лахъхъин буллалисса школа шярраву тӀитирчагума. Шярравува оьрчӀру чан хъанай бухувкун, хъхъуттайх лахъан лахъхъин за-

Июнь зурул 26-ний Каспийск шагърулийсса «Каспий» тӀисса банкетру бай залдануву хъунмасса уттарашинна дия. Гур бусса хъатӀул кьини кунмасса. Цалчинмур ЦувкӀуллал жямат, лакрал интеллигенциялул вакилтал ва активисттал бавтӀун бия «Удивительные люди» тӀисса телешоулий ххув хъусса пагъламан Камил Маммаев барча уван, ванал гъунардания, сисаврия цивппа хӀайранну бушиву бусан.



Камиллул барчаллагъ увкуна цаятува ва цала гъунардаяту бусайсса «Илчи» кказитрал редакциялухъ.



назиссагу чанну бия. Санкт-Петербурглив Расул Абакаровлул цӀунилгу гъаз дурна пагъламантурал цӀа. Камилгу пагъламаншиврул ттугъ бюхттулну гъаз бувну най ия. Утти ваналгу телешоулий тамаша бувцирив махӀаттал бунни, ванал гъунарданун жюрилулгу, тамашачитуралгу лахъсса кьимат бившунни». Шярваллил Жяматийсса советрал чулуха Камиллул дулуна ХӀурматрал грамотагу.

Дагъусттаннал лайкь хъусса строитель Мурта Муртаевлул кӀицӀ лавгуна Камил Маммаевлул ниттил ппу МахӀаммадагу цӀанихъса зюннавчи ва пагъламанчи ивкӀшиву, барчаллагъ баян бувна Камиллул лайкьсса тарбия дулаврихлу ванал ниттийн, захӀмат ххирасса, дакӀаьмал ххуйсса Мугъажиратлуин.

Буршиял жяматрал вакил Султан Цахаевлул кӀицӀ лав-


гуна Камил Маммаевлул шалвагу лакрал миллатрал дакӀру тирх учин дувансса, лаккучувнал яхӀ, кьирият ккаккан дувансса гъунар бувшиву.

Камил барча уллалисса ихтилатру бувна ЦувкӀуллал пагъламантурал школулул хъунама Рамазан ХӀажиевлул, «Каспий» залданул заллу, предприниматель МахӀаммад Аминовлул, Чувшиврул орденналун лайкь хъусса Полина Халиловал, жя-

Санкт-Петербурглив Расул Абакаровлул цӀунилгу гъаз дурна пагъламантурал цӀа. Камилгу пагъламаншиврул ттугъ бюхттулну гъаз бувну най ур.

матийсса ишккакку Забида Абдуллаевал, Каспийскалийсса цувкӀуллал активистка Соня Рамазановал ва цаймигу бусравсса инсантурал. Ихтилатру буллалцирив мукӀру хъанай бия цивппа пахрулий бушиву кьанкьасса, вас-цацх цирив кьакӀулсса, пагъламандалий буцирив журналул гъунардун буллалисса Камиллул. Шалва зал бивсса найраха лавхъуну сукку тӀий бия. Рищурцу, балайрду, кьавтӀавуртту, шадшиву. Гъарцаннал зумувсса махъгу «Камил» тӀисса бия. Ванал цӀа микрофон бувгъуманал зуму ларстарив, залданува хъатурдил чӀярх буккайва. Камил-

ду ккаккан буллай ур, щилчӀав уттинин ккаккан кьадурсса трюкру дуллай дур. Ттун хаварбакъулий кунма хавар хъуна ва лахъа-хъун уван жямат батӀлай бушиву, ттунмагу бучӀан бучӀихъунссархха тӀий, бувкра нагу, гъарзатгу кьариртун. Отпускалаий Дагъусттаннайн бувкӀун бунува, укун ххуйсса



лушал сурат рищун ччисса агълу чан хъанай бакъая. Залданувуми, кӀулмигу, кьакӀулмигу куннах кув бургулай, симаннаву дусшиврул ва уссушиврул лишанну кьютӀи дан хъанай бакъая. Ахирданий Ибадуллагъ Данияловлул барчаллагъ увкуна ва зал уквал буллусса МахӀаммад Аминовлухъгу, Камиллул кьини хъун дуван бувкӀириннахъгу.

Камиллул барчаллагъ увкуна цаятува ва цала гъунардаяту бусайсса «Илчи» кказитрал редакциялухъ.

Вайнна залданувун бавтӀицириннавацца цаппараннал пикрирдугу.

Зулайхат Кьурбанова (Тверь шагърулийсса):

– На Камиллушал кӀул хъуссияв Москваливсса мероприятиялий. ХъуручӀи кунна лухӀисса, лахъисса чӀарардашалсса, лухӀипуршисса симандалушалсса, утгасса хъачӀунтташалсса ва лаккучув ухъунссар тӀисса пикри ча багъайссия, кьатӀаллил билаятрайсса жагъил ххива. Ва лаккучув усса кӀул шайхту, ххари хъунав, ххисалдаран гъурбатрай лакку маз личинува тӀаьнну, нахӀуну баллан бикӀайхха. Яла, махъату, кӀул хъуна ххалуьх тараза дакъа лахъийсса пагъламан ушиву. Ялугълай, я батӀин кьахъанай бивкӀра ванал «Россия» каналданийсса гъунардаягу. Буниялттунгу, караматсса, вих хъун кьабюхъийсса номер-

мероприятаялий гьуртту хъунсса сантгу дагъунни. Камиллул чӀарав бавцӀуну суратругу рищав.

Абдул Арсланов (Дарбант):
– Ттун хъинну ххуй дирзунни «Илчилул» лавгсса номерданий ва цӀувкӀрачувнал ххувшаврия бусласисса махӀалалун «Караматсса Камил» тӀисса цӀа дизаву. Акъаривла караматсса оьрчӀи? Гъинта куна куклуну, зирангуну ачай хъхъуттайх. Бургу тиккун, цӀанакулгу леххан хӀадурсса барзу куна ур. Ва ххувшаврийнгу ЦувкӀуллал барзу гъаваллавун гъаз хъунни куну учайссар.

Эльвира Абдуллаева (Щу-ссаккул):

– Ва Камиллул бивсса гъарца гъунарданува циняв лак пахрулувун бутлатисса зунттал чувнал зирангшиву, чувшиву, сисаву чӀалан дикӀай. Ттун мадарацца ккулгу чӀалай бур залдануву, ва иширалгу дакӀи ххари дунни. ДакӀинийхтунусса барчаллагъри цувкӀуллал агъалинан, Камиллул укун лахъисса кьимат бищун бувксса. Жулла нех хъхъичӀра хъхъичӀ жура хъун дан аьркинссар. Гъархъхъуну ва зал хъатурдил гургулул лавсун бия. Хъунмасса пахру багъунни жулва лакара. Камиллул дуняллул лагърулийсса шоулийгу ххув хъунсса тӀайлабацӀу чӀа тӀий бура. Лайкьри, валлагъ, мукунми ххувшавуртангу!

Суратру авторнал

Жула хІакинтал

«Инсаннал оьрму ххассал бан хьурчан, мурадирайн ияра»

Ва ххуллукъ бусан ччай бур агъалинал цІуллу сагъшиврул къаралданийсса, захІматсса иширттавун багъминначІан медициналул вертолетрай кумаграшал ялун ийсса хІакин, ШавкІуллал шяраватусса Учюев Иосифлул арс Давудлуя. Ваная жу чивчуну буссия коронавирусал пандемиялул цІумалгу.

Залму АБДУРАХІМАНОВА

Цалва агъаммур пишалуцІун ва зий ур Катастрофардал медициналул Дагъусттаннайсса центрданул вертолетрайсса анавар кумаграл хъунаманугу. 2021 шинал Давуд лайкь хъуссар шалва Аьрасатнал «Золотой час» тІисса санитар авиациялул премиялий «Врач года санавиации РФ» тІисса номинациялул лау-



Давуд даврил уртакътурашал



реатнал ца ласун. Республикалул медициналувугу Давудлул ца ххуйну кІулссар, ва цимилгу лайкь хъуссар ХІурматрал грамотарттан ва Барчаллагьрал чагъардан. Ванал хІурмат хъун-массар архІал зузминначІа ва кІулминначІа.

– Давуд, медицина язи дугъан ци савав хъуна вил оьрмулуву?

– Школа къуртал бан хъунма хІал къаливчІисса цІумал ттун багълай бия, я юристнал, я хІакиннал пиша язи бувгъуну, ца чулийн уккан. Нитти-буттал ттухъуну ца хъхъу-къини дуллуна, пикри бувну, цания-цанний ацІан. Жула агълу-авладрай юристтал укунмагу чансса бакъарча куну, пикри хъуна хІакинналмур пиша язи бугъан. ХІасил, увхра дуклан Дагъусттаннал медициналул университетравун. 2-мур курсирай дуклай уна Республикалул клиникалул азарханалий санитарну зун лавгра. Хъиривмур шинал, 3-мур курсирай дуклакисса ппурттву, хІарачат бувссия медбратнал курсругу къуртал бан. Му-

ния махъ, 2016 шинайннин, гава азарханалий зий уссияв реанимациялул отделениялий медбратну. ДГМУ-лул 6-мур курсирай дуклакисса цІумал, фельдшернал сертификатту ларсун, ва цІана нава зузисса центрданийсса трассалул медпунктрай зун айивхъура. БакІрайва икІайссияв, хирург хъуну, операцияртту буллансса хиялай. Яла, ординатура къуртал бвну махъ, ДЦМК-лий трассалул отделениялий хІакинну зунсса пикри багъуна. Мукуна цал архІал зий икІайссияв Н.Цаххаевлул цІанийсса Травматологиялул азарханалийгу, санитар авиациялий борт-хирургнугу.

– Хирург хІисаврай инава бувсса цалчинмур операциягу дакІний бурив?

– Буркбай! Циняв дахъва бай-бихълахъисса хирургтуран кунма, аппендицит къукъин багъсса ттула цалчинсса операция хъамабитайссарив.

– Винма бан багъсса яла захІматмур операцияли-ягу бусаннав?

– ДакІний дур, ххуллий кІива-



шанма машина шуну, гужсса авариялуву захІматсса цІунцияртту хъусса 35 шинавусса жагъил Травматологиялул азарханалийн увцуну бувкІисса цІун. Му духъунссия 2019 шин. Ганал чурхай, лихха-личчари шаврил, ца сагъсса базу ливчІун бакъая. Анаварсса мутталый жуца га, ххал увну, дуруххан шаймур дурруххуну, дазин шаймур дарзуну, цукунугу, ххассал ан бювхъуна. Азарханалий жагъилнал сайки ца барз хъуна, реабилитациялия махъ сагъ-саламатну цала ччаннай занайгу ушиву кІул хъуна.

– Зул пиша цуппа бивкІуллул ххяппуртташа инсан ххассал уллалисса пиша хъанай бур. Инсаннал оьрму буруччин бювхъусса бувчІукун, ци асарду загъир шай виву?

– Инсаннал оьрму ххассал бан бюхъарчан, дакІнивусса ххаришиврул дазу-зума къадикІай. Аллагънайну лаизлай икІара.

«Ятіул зоналий»

КІанал кумаграйну буніялагу ттушава инсаннал оьрму ххассал бан бювхъуннихха тІий. Умуд бикІай къиямасса къини Хъуна-сса Заннал хъхъичІ цІуххаву дайни ттула захІматрал хІасиллугу хІисав данхъуви тІисса.

– Ковидрал эпидемия сукку хъусса цІумал зул къуллугърал даврил низам даххана хъунав? Цукун, ци шартІирдаву зий бивкІру?

– Ковидрал цІун хъамарагу къаритай. Му дия 2020 шинал март зурул дайдихъу. На дахъа санитар авиациялул хІакин-консультантнугу, авиа-медициналул эвакуациялул хІакиннугу зун айивхъусса цІун дия. Ковид сукку хъуну так ца хъхъичІисса шанма зурул мутталый ттун вертолетрайсса аьрххирдай леххан багъуна 168-ла. Жу ххассал бувну бия 200-нниха ливчусса инсангал. Му цІумал на ялагу зий уссияв лахъай азардал

азарханалий реанимациялул отделениялийгу. ХІакинтал биял къахъанахъисса цІун дияхха та.

– ЦІана ссаха зий ура? Ци бигарду багъайссар вийн му къуллугърай?

– 2022 шинал январьдания шийнай на зий ура Анаварсса кумаграл трассалул медпунктрал отделениялул хъунама хІакинну. Жул къуллугърайн багъайссар ДТП-рттаву, биявурттаву цІунцияртту хъусса халкъ анаварну азарханалийн биян баву. Мукуна, шинавун оьвкъун, ча-унугу агъну цІунция хъума, ккулла шума ва цаймигу инсаннал оьрмулул нигъачІисса иширттавун багъми ххассал бан хъхъичІва-хъхъичІ, сиренардугу лархъун, ххуллийн буккайми ягу вертолет гъаваллавул гъаз даймм медициналул зузалт жул къуллугърал зузалтри.

– Махъ ппурттугу Дагъусттаннай ца яла дирину шурушимур ва хъхъичІуннай нанимур туризм дур. ЖучІанма бигъалаган бувкІисса хъамал, туристтал ххассал бан багъсса ишругу хъурив вил практикалуву?

– Хъуна мукуна ишгу ларгсса шинал августрай. Жул диспетчертурал телефондалийн дуркІуна Докъузпариннал райондалийсса Къуруш тІисса шяравун бувкІисса альпинисттураясса леххаву, цашалсса ца Яридагъ зунтуя агъунни тІисса. Га бия жагъилсса душ. Ца хъхъу-къини хъуну дия ганил, кІулшилийгу бакъа, альпинисттурал трасрай ххяллул ялув зурчІай тІий. Лихха-личчари хъуну, цимирагу цІунция хъуну дия ганий. Вертолетрай, ИВЛ-аппаратрай бивхъуну, биян бувссия Республикалул Хъунмур азарханалийн. Хъин бувну, цила ччаннай лавгссар жучІату га альпинистка.

– Вийнма къабагъайсса хІакинналми буржругу биттур бан багъссарив вин му пишайлий?


– Багъссар. Ца шанна-мукъра шинал хъхъичІ ттун багъссар Сулакьяясса хъамитайпалун, ва ххуллийх най буна оьрчІ буллай байбивхъуну, ххуллийва, нава зузисса реанимобильдану, кумаг бан. Увна цІуллу сагъшиврул оьвхъусса оьрчІ. Га хъамитайпагу, оьрчІгу фельдшернайн тапшур бувну, къатІувай увксса цІумал ялун ивуна ганил лас. Ххаришиврул ттуйн хъямалагу агъну, ттул цІагу цІувххуну, баян бувна арсан Давуд тІисса цІа дизлай ушиву.

– Цуппа хІакиннал пиша захІматсса пиша бунуккар...

– ЗахІматсса гъарцагу чулуха – ччарча психологиялул, ччарчагу чурх багъІат шаврил чулуха. Дежурствалия увкІун, шанугу лавхъун, кулпатрацал, оьрчІашал цІун гъан дуркун, цІунилгу дакІгу, пикрирдугу, хияллу, цалчин кунма, даврияссар бусса бакІраву хІасул хъанай.

Кулпатрал къинилун хасну Буттал къатта

Июль зурул 8-нний Аьрасатнаву кIицI лагай Кулпатрал къини. Лахъа-хъун бай чIявусса оьрчIру бусса, оьрмулугу, захIматралгу ххуллий лайкъсса кIанттурду бувгъусса кулпатру. ЦIакъсса, нахIу-хIалимсса кулпат бангу ляличIисса магьиршиву, усттаршиву аьркинхъунсар. Гъарицагу инсаннал тарбиялуд, яхIкъириятрал, ас-намусрал гъану кулпатравур бизайсса. Инсаннал гихунмайсса оьрмулудугу чIявусса затру мунийн хъар шай. Ттун бусан ччива, тай захIматсса дъьвилуд шиннардий чIявусса оьрчIру хъунигу бувну, ххаллилсса тарбиягу дуллусса, Ваччийл шяравасса Маккуевхъал кулпатра.



Адриана АБДУЛЛАЕВА

Асадуллагъул ва Жавагъил кулпатраву бивкIун бур 11 пала ва 2 бувцусса оьрчI: 13 оьрчI, 2-3-гума лашу-шаллу бан захIматсса чIумал. Гъай-гъай, ккашимякъсса дъьвилуд ва дъьвилля махъсса шиннардий миксса оьрчIру хъуни бан, яла-яла, цаламиннал ялун чил оьрчIругу буцин бунялагу хъуннасса виричувшиву аьркинни.

Дъьви байбивхъусса шинал Асадуллагъулун 36 шин диркIун дур. Му чIумал ва 6 оьрчIал ппу ивкIун ур. Хушрай аьраин гъан военкоматраин увкIсса Асадуллагъа зана ивтун ур, шярваллил советрай каялувшиву дансса инсан аьркинну ур тIий. Мукун, тай шиннардий ва Ваччав шярваллил советрал председателюну, мунир махъ Ккуллал райондал председателюну ва бухгалтерну зий ивкIун ур. Жавагъи Ваччийл школалий четрал зузалану бивкIун бур, оьрчIру тарбия баврил хъунмур хъаргу Жавагъин лахъан багъну бур, давуртгал къайгъурдаха адаминал мажал бакъа. Ва хъуннасса жаваблувшиву ва ссаур аьркинсса давугу Жавагъил усттарну дурну дур. Дъьви байбивхъусса шинал хъунмур душнин 10 шин диркIун дур, чIанма-чIивимунин дахъра 1 шин. ЧIалачIисса куцуй, хъунмамур гайми оьрчIалсса бансса, ниттин ка-кумаг бансса оьрмулуду къабивкIун бур. Жавагъингу цинма хIарачат бан багълай бивкIун бур. Бухъунссия инсаншиврул бутIа ххишалану буллусса хъамитайпа, чIявусса оьрчIру цилагу бунува, нину-ппу бакъасса, ятинсса душ бувцуну, циламинная личи къабувну, хъунмагу бувну, шаргу буллуну бур.

Ккуллал райондалий Жавагъи хъуссар «Нину-виричув» тIисса цIа ларсъсса цалчинсса хъамитайпа. Ва цIагу ванил мйажаннугусса виричувшиврийну лайкъ дурну дур.

Жавагъища бювхъуну бур оьрчIру куннах кувгу, нитти-буттаху вичи дихълай, цанна-

Асадуллагъ ва Жавагъи

Жавагъи
арс МахIаммадхIажинашал

Ккуллал райондалий Жавагъи хъуссар «Нину-виричув» тIисса цIа ларсъсса цалчинсса хъамитайпа.

ха цаннал аякъа дулла тарбия бан. Хъуниминналгу, мюрциминналгу дяннв нахIу-хIалимсса арарду дусса Маккуевхъал кулпат эбратрансса кулпатну ккаккан байсса бивкIун бур.

– ЖучIа нитти-буттал хIурматту, кувннал кувннахсса ччавугу хъуннасса дикIайва. Жул кулпатраву тачIав къавхъуссар цаннал цаннан къаччан бикIан бувсса иш. Гъарица оьрчIан цанна-цанна ккаккан дурсса давуртту дикIайссия. Хъуни хъуну, жушава нитти-буттан кумаг бан, мюрциминнаха аякъа дан хъанай бушиврия жу ххарину бикIайссия. Кулпатраву ккаккан дурсса низам дикIайва. Мунийн циняв мютIи шайссия. Нитти-буттал ккаккан дур-

сса давурттацIун гъарицаннахъ цанна ччимуннаха, дакIнил ларсмуниха зунсса ихтияргу дуссия. Гъай-гъай, бигъану бакъа-хъунссия нитти-буттан жу циняв дукан, лаххан-ликкан бан, гъарнахъ цIани-цIай бан, дарсирдайн хIадур бан. Му чулуха жул кулпатран ххуйсса кумаг хъуну бия тай шиннардий чIявусса оьрчIру бусса, ахIвал кIюласса кулпатирттан кумагран тIивтIусса школа-интернатра. Мукунсса интернатру буссия МахIачкъалалив, Хасаврай, Каспийскалий. Жул кулпатрава ххюва оьрчI дуклай бивкIессар интернатрай. Гъинттул тIурча, циняв шяраву нитти-буттачIа батIайссия, – тIий, дакIнийн бутлай ур чIярусса шиннардий МахIачкъалалал 22-мур лицейрал директорну ивкIсса ххаллилсса педагог МахIаммадхIажин Маккуев. Буттал къатта хъуну бур вайннан гъармуния бурувчусса къалану ва ччаву-аякъа дусса кюрону.

Школа къуртал бувну махъ 9 оьрчIал ларайсса, вайминнал дяннвсса даражалул кIулшивуртту ларсун дур. ЧIявучин ххуйну кIулссар 40-нния лирчусса шиннардий Дагъусттаннал медициналул академиялув дурс дихълай ивкIсса Макъсуд, Дагъусттаннал лайкъ хъусса учитель.

Жижара

МАХIАММАД-
РАСУЛЛУЛ ДУШ
АБДУЛЛАЕВА
СИЯЛИ

Вай гъантрай мукъцIал лавхъунни Ккурккуллал шяравасса ххаллилсса инсан, кару музилсса, дакI-аьмал хъинсса хъамитайпа Аьбдуллаева Сияли МахIаммадрасуллул душ аьпалухъун лавгун.

Бувну бур Сияли 1960-ку шинал апрель зурул 23-нний Ставрополлал крайрайсса Канглы тIисса шяраву. ЧIярусса шиннардий зий бивкIун бур Железноводскалий Нарзаннал заводрай.

Шар хъуну Ккурклив бивкIун махъ сайки 40 шинай (1985-

2023ш.ш.) зий бивкIун бур шярваллил библиотекалул хъунмурну. Махъсса шиннардий библиотекалул цила сипталий тIивтIуну зузи бувну буссия ссихърал театр. Библиотекалий зузисса шиннардий ванил цикссагу мероприятияртту дурссар дуклаки оьрчIашал ва шярваллил жяматрашал. Ва бия цила даву ххирасса, гъирагу, гъавасгу бусса зузала.

Сияли бия дакI цимисса, инсаншиврул бутIа буллусса хъамитайпа. Мюршисса оьрчIал ялату ласнал ссу бивкIукун, шанма цила оьрчIал ялун шанма ванилссагу бувцуну, хъуни бувссар Сияли.

Сияли бия итххяхъсса, дандиган кIулсса, кару магьирсса хъамитайпа. Хасъсса кIулшивуртту ларсъсса бакъанугу, канил кушу усттарну байва. Цуппава бия инсаннан кумаг бан, чIарав бацIан ччисса. Бия бусан-учин кIулсса, мукъуй цIу бусса. Чил кIанттурдай бувну, хъунма хъуну бунугу, марцIну кIулссия лакку маз. Сияли гъуртту шайва шяравугу, райондалийгу дуллалисса жяматийсса давурттавах. Ва ххирасса бия мачча-гъаннангу, чIаххувчIараханангу.

Сияли аьпалул шаврил къурчIиву кIидачIлай, жижара буллай буру ласнахъ, оьрчIахъ, цинявппа гъан-маччанахъ.

РухI хъинний дшиннав, алжаннул ххари баннав, махънал оьрмурдай барачат бишиннав.

Ккурккуллал жямат

СУЛТАНМУРАДЛУЛ
АРС АРКУЕВ
ХАНКИШИ

Шин ларгунни ххаллилсса лаккучув, нахIу-хIалимсса дакIнил заллу, жяматрал дяннв бусравсса инсан, ЧIаящиял шяравасса СултанмухIадлул ва ПатIимал арс Аркуев Ханкиши шяраву 1949-кусса шинал.

Увну ур Ханкиши ЧIаящиял шяраву 1949-кусса шинал. ТIюхчардал дяннвмур даражалул школагу къуртал бувну, дуклан увххун ур Буйнакскаллал шярваллил хозийстволул техникумравун.

Техникумгу къуртал бувну,

механикнал пишагу лавхъхъуну, зана хъуну ур махъунай шяравун. 1969-ку шинай зий ивкIун ур совхозраву – цал загварну, хъиривсса шиннардий – инженерну, шярваллил советрал председателюну.

Цала оьрмулуд дус Саиятлушал ванал, тарбиягу бувну, чивун буккан бувссар мукъва душ ва ца арс. Ва ия дакI-аьмал хъинсса, хасиятрал авкъусса, чIарав ацIан анавар уккайсса, цала жямат ххирасса, шяраву хъанахъисса гъарца иширавух хIала ухайсса чув. Хъунама уссу хIисаврай муданагу цала уссу-ссураврал чул бищай къалану уссия.

ХIакъинусса къинигу ва дакIнийн утай ва ванал цIа бусраврай зумух ласай архIал зий бивкIиминнал, кIулминнал.

**ЧIаящиял, ТIюхчардал
ва Къяннал жяматру**

САИЯТЛУЛ ЦИЛА ЛАСНАХА

*Ккаккангу хъурдай чинсса,
Ккаккангу ххари хъунсса,
Ттул бювхъу чурххал заллу,
Тти ххал къахъунтIиссарав?*

*Ттул гъараягу магъий,
Ттул бургъилухссагу ххют,
Ина акъасса гъантри
На цукун гъан буллава?*

Баян

РедакциялуцIун дархIусса тIалавшиннардайн бувну, «Илчилий» бишлашисса жижаратгал текстру буссар укунсса багърал лагрулий: укунмасса жижара – 200 къ., сурагърашалсса некролог – 500 къ.

«ИЛЧИЛУЛ» редакция

Лакрал халкъуннал учаларттава

Мискинчу авадан хъувкун, я царсса дуцлан, я къатри дуллан иклайссар.

Мурчун хъху рашав, кыни рашав.

Мурхыраха лархъхуссар ахъулссагу диклайсса.

Мюрш ххютту оърчлах хъуну дур.

Никираймургу – оърчI, хъаралумургу – цар.

Ниттил дакI къувлуаргу кIукIлуссар, чарияргу къанкъассар.

Ниттил ссавурданул гъарзат дуклайссар.

НакIлих лавхъхумур нуркIлих хъамакъабитайссар.

ОърчIай бигар биша – инава хъириг насу.

ОърчI бусса хъатIу ссалчIав къабувчуссар.

ОърчI бивчIансса чIила къаларкъуссар.


ОърчI бусса ужагърая хъахъаву чан къашайссар.

ОърчIал оърчIру ницIаяргу нацIуссар.

ОърчIал чIиртту хъярин буллаи бур.

Чунлахъиялун

КIяламиннул 2 ходрай мат дихълай бур.



*L.Krc3 Kpa1 2.Krc2x
L...Krc1 2.Ff1x*



«Илчи» – маслихатчи Цуллу-сагъшивруцIунсса маслихатру

ЧIавахълтгах гъава цалнир цал кIири хъанай бур. Цукунни кIиришиврия буручинтIисса? Табиатрал цилва ва кIанттулгу пикри буну бур, гъарца инсаннаву дирхъуну термо-регуляциялун механизм. Гъава кIири шайхту, жулла обттул сосудру гъарта дуклай дур, дуклакисса гъухъ гъарза хъанай дур. Дунугу, гъарца организмалул бур кIиришиврушал лаллансса цилва-цилва гуж, цилла хасшивуртту: укун, цавайннал кIиришиву бигъану духIай, вайминнал – лап захIматну. КIиришиву духIан яла-яла захIмат хъанай бур кIюкIлил ва сосудирттал, эндокринная системартгал къашайшивуртту думиннал, оърмулул бугъараминнал, лякълуву бусса хъаннин. Шин бухъурчангу, кIиришиву духIавриву дакIиний бичаврил ххуллийсса цаппарасса маслихатру къабахчинссар тIиссару.

КIиришивруца бурувчуну бикIаншиврул


БУРГЪИЯ ЛАБИКИН

Бюхъавай, бургъия лабикI-лакIи, вагу цирча, ца минутI-райсса букваврилгу цичIав къахъунссарча тIий, бакIрай зат дакъа хIаятравун, чIаххуврайсса ттучандалийн кIири бургъилу къабуклай. Шикку чансса, тикку чансса тIий, кIири лаглай, бурчугу багъайссаннуяр ччу-чайссар, ччяни хъунмав шайссар, бакIрангу, чурххангу зарал бияйссар, най буна ялун къачIаларчангу, ялун къаличирчангу. Бургъия зарал инсан га уний тIирх куну агъний бакъа къабивсса ххай мабикIару.

КъатIув, бюхъавай, баргъ кIири бунний бувагу мабуккари (ссят 11-нния 16 хъуннин). Букъавкун къабучIисса иш бухъурчагу, бакIрай зат дакъа ягу бургъиясса ххют дакъа, баргъ лачIаврийн къаршисса крем къадурккун мабуккари, шайссаксса ххют думи кIантурдайх сакингудуvara зулва аърххилул маршрут.

ЯННА ЛАХХИРА ЧАННАССА ВА ЧУРХХАЦИН КЪАЛАРЧИССА

КIиришиву дусса зурдардий лахлахира, бюхъавай, чаннасса, чурххацIун къаларчIисса янна-ус, синтетика хIала дурагу дакъасса ягу чансса янналия дурсса. Гъинтнил зурдардий махъаллил хъяра обтту шурушаврин дайшишру дуллалисса



ЧIурусса мухIулттая, мукунна кIиришиву ва кIушиву ххи дуллалисса чIюлушиннардия, лажиндарал бурчу башан буллалисса, ссиXI буххан къабитлатисса чIяру косметикалия, къанкъа аьнтсса аьтрилия, ччанну буруххан буллалисса никъа лахъусса.

ДИЯЛССА ШИН ХIАЧИРА

Гъава кIирисса чIумал гъантлун диялсса шин (2,5 – 3 литра) хIачIаврил ялув хъиннува бацIира. КIирисса гъантрай чурххаву шинал баланс лияйссар, чIярусса хъатрулуцIа хъанай. Махъаллил хъун аъркинссар (кIиришиву дусса гъантрай бакъа, муданмагу) нацIусса ва газ бусса щиная.

МИКIЛАРЧИССА ЩИНАЙ – КЪАДАГЪА

Гъава кIирисса, хханхха бакъагу, щалвавагу чурх кIири лавгсса гъантрай хъуннасса ни-гъачIаву дуссар микIларчIисса, хъинну дяркъусса щиная: хIачIан хъуннав, щинавун бучIан хъуннав. Цакуну температура даххана шаврия жунма я мюнпат, я дюхлу дакъассар. ХIачIира къатлул температуралийсса шин. Щинавун бучIан ишла дуvara гъилисса шин.

КОНДИЦИОНЕР ИШЛА ДУВАРА ТАРИНУ

Ттизаманнул инсантурава чIявуминнаща кондиционер дакъа бацIан къашай. Тайлар, кондиционерданул хIасул дувай чурххан тIааьнсса гъавалул тагъар, кIинттул дикIу, гъинттул дикIу. Амма хъамамабитарувания хъунмасса зарал биян бюхъайшивугу. КIирисса къатIату кондиционерданул бякъин бусса къатлувун (кабинетравун) цакуну буххаврия ва бивкъусса къатлува кIирисса къатIув най буна букваврия зарал буссар, ва даву мугъаятну, чан-чанну тIий дуван аъркинссар. Кондиционеру ишла дуvara мугъаятну.

ССУПРАЛИЙ ЧIЯРУ ДУВАРА АХЪУЛССА ВА АХЪНИЛССА

КIирисса зурдардий махъаллил хъуну хъинссар хъиннура аьгъусса ва цIу бусса дукралия. ЧIяру дурну хъинссар ахъулсса ва ахънилсса. Амма хъамамабитару ва курчIил махъанарду дукралувун ишла дуллалисса ахъулсса, ахънилсса, накълил уртту ххуйну шюшин, махъра-махъугу, крандалувасса щинай шюршуну махъ, марцIисса шаралархъсса щинай шюшин, бюхълахъисса иш бунний, ялтту кIирисса шингума дутIаван. Накълил урттурив 20-30 минутIрайсса диртун хъинссар чан-чансса цIу ва сода бивчусса щинаву.

Ахъулсса ва ахънилсса, тадухъурчангу, дикIан аъркинссар шаллусса, зия хъанан къадиркIисса, гъава кIириныйрив хаснура.

Гухунмайгу буссар

**ХIадур бувссар
Бадрижамал АБЛИЕВАЛ**



Газета «Илчи» (Вестник)

Учредитель:
Агентство информации и печати
Республики Дагестан

Хъунама редакторнахлу:
БАШАЕВ Р.М.
Тел.. 65-00-07

Къардашов Р. Ав. Тел. 65-03-12
хъунама редакторнал хъиривма

Редколлегия:
Адамов АбдурахIман
МахIаммадович
Аьлиев ХIажи Сулайманович
Исрапилов Артур Анварович
КъурбанмахIаммадов Чанкура
Рамазанович
Маммаев Сулайман
Нураттинович
МахIаммадов Юсуп ХIамидович
Хаппалаев Аслан Юсупович
Хасаева Гульшан Рамазановна
ХIажимирзаев Зиябуттин
Абусупиянович
Шалласуев Шалласу Рамазанович
Эльдарова Роза ХIажиевна

Отделал редактортал:
Аьбдуллаева А. П.
Аьдилов ХI. А.
Рамазанова П. ХI.
Тахакаева З. К.

Корреспондентъгал:
АьбдурахIманова З. Т.
Аьлиева Б. Д.
Саидова И. А.

Корректор:
АХIмадова А.И.

Кказитрал компьютерданул цех:
Абакарова К. Н.
ХIажиева З. У.

Кказитрай дурксса макъаларттаву
кIицI лавгмур тIайлашиврул жаваб
дулайссар чивчуманал.
Редакция макъалалул залуннал
пикрилий рязину бакъахъурчагу,
макъала ришайссар, жяматрал
цаламур пикри бусанссар тIисса
ниятрай. Кказитрай дуркIисса
макъаларттайн рецензия къачи-
чайссар ва ми залуннахъхъун
зана къадайссар.

Кказит буккайссар нюжмардий цал.
Шинай итабакъайссар 52 номер.

Кказитрал индекс. П7046
Тираж – 2000 экз.

Адрес редакции и издателя:
367018, г. Махачкала,
пр-т Насрутдинова, 1а
e-mail. ilchi@rambler.ru
http://ilchi.info
Тел./факс. 65-00-07

Газета «Илчи» зарегистрирована
Управлением Федеральной службы
по надзору в сфере связи, инфор-
мационных технологий и массовых
коммуникаций по РД.
Рег. ПИ № ТУ 05-00424
от 30.04.2019

Газета «Илчи» отпечатана
в типографии ООО «Издательство
«Лотос».
367018, РД г. Махачкала,
Пр-т Насрутдинова, 1а
Срок подписания в печать 19.00.
Подписано 19.00.

Цена свободная



4 651116 280051

МАХIАЧКЪАЛА

Гъавалул тагъар

ГЪУМУЧИ

